

କରନ୍ତି ମଣ୍ଡଳୀ ନିମନ୍ତେ ପାଠଲଙ୍କ ଲିଖିତ ଦ୍ଵୀତିୟ ପତ୍ର କରନ୍ତି କୁଲମିତାକି ପାଞ୍ଚୁଲ ରାଠାମାନି ରୀ ଲମ୍ବର ଆକୁ ମୂଳୁ ହାଡ଼ା

କରନ୍ତି କୁଲମିତା ରୀ ଲମ୍ବର ଆକୁ ପାଣ୍ଡୁଓଆହାମାନି ପାଞ୍ଚୁଲ ତାଣ୍ଡାଟି ଜୀସୁ କ୍ରୀସୁ ଜାନୀତି ୫୫-୫୭ ବାର୍ଷୀ ତାୟୁ ରାୟୁକି ଆହାମାତେ ୧:୧ । ମା ତାଣ୍ଡା ମାନି କରନ୍ତି କୁଲମିକି ରାଠାମାନି ଆକୁ ବିତ୍ତାଟି ଇଦି ଆହିମାନେ ପାଞ୍ଚୁଲତି ରୀ ଲମ୍ବର ଆକୁ । ମେରାପୁନାରି ନାମିମାନେରି ଇଦାଆଁ ନକେଏ ପାଞ୍ଚୁଲ କରନ୍ତି କୁଲମିତି ଦାକା ହୀହାନା ରାଠାମାତେସି ୨:୩-୪ ପଦୁତା ଏଞ୍ଜାସି ଖେସିମାନେସି ।

ପାଞ୍ଚୁଲ ମାକିଦନିୟାତା ମାନି ବେଲାତା କରନ୍ତିତି ରୀ ଲମ୍ବର ଆକୁ ରାଠାମାନେସି ୨:୧୩ । କରନ୍ତିତା ମାନି କୁଲମିତି କାତା ତିତସ ତାଣ୍ଡାଟି ନେହୁଁ କାରୁ ବେଟାଆହାନା ରାହୁଁ ଆହିମାନେସି । ଇ ଆକୁତା ପୁଃନି ମେରା ଅଣ୍ପୁଟି ଦାନା ହୀନି କାତା ଜାପିନାୟି । ଇ ଆକୁତା ଜିରୁସାଲମତା ମାନି କ୍ରୀସୁଇଁ ନାମାମାନି ଲକୁଇଁ ସାୟେମି କିହାଲି ଟାକାୟାଁ କୃଡ଼ିକିହାଲି ଖେସିମାନେସି ୮-୯ । ଅଡ଼େ ଜିକେଏ କୁଲମି ପାଙ୍ଗାଟି କରେକା ମିତି ପାଣ୍ଡୁଓ ଆହାମାନାରି ଜାହାରାଇଁ କାଜାରି କିହାକତାଲି ପାଞ୍ଚୁଲ କପାଟି କୁଲମିତି ଏଚରଜାଣା କାଜାରାଇଁ ନିନ୍ଦା କାତା ଖେସିମାନେରି । ଏଞ୍ଜାରି ପାଞ୍ଚୁଲତି ଅଦିକାରାତି ଆନାମାନା ଆହିମାନେରି । ଏମିନିଗାଟାଣି ରୀ ଲମ୍ବର କରନ୍ତି ଆକୁତି ରାନିଞ୍ଜାକି ଏଞ୍ଜାସି ର. କ୍ରୀସୁତି ଅଦିକାରା ତଲେ ପାଣ୍ଡୁଓ ଆଡ଼ାସି ଇଞ୍ଜୁଁ ଜାଣ୍ଡେତଲେ ଖେସିମାନେସି ।

ପତିତା ମାନାୟି

୧. ପାଞ୍ଚୁଲ ଜହରା କିହାନା ଆକୁ ରାଠିନାୟି । ୧:୧-୭

- ୨. ପାଞ୍ଚୁଲ ତାନି ହାନି ଜିରୁତି ବାଦଲି କିନାୟି ଇଞ୍ଜା ଏଞ୍ଜାରି ତାଣାଟି
 ବେଟାଆହାମାନି କାତାତାକି ଷେଣ୍ଟେ ଷେହ୍ନାୟି । ୧:୮-୭:୧୭
- ୩. ଜିରୁସାଲମତି ନାମୁଗାଟି ତାୟିୟାକି ଦାନା କୃଡ଼ିକିହାଲି
 ଷେହ୍ନାୟି । ୮:୧-୯:୧୫
- ୪. ପାଞ୍ଚୁଲ ତାନି ପାଣ୍ଡୁଝିଆହାମାନି ପାଣାଟି ଜାଣ୍ଟେ ଷେହ୍ନାୟି ।
 ୧୦:୧-୧୩:୧୦
- ୫. ଆକୁତି ରାପ୍ନି କାତା । ୧୩:୧୧-୧୪

୧ ପାଞ୍ଚୁଲ ମାହାପୁରୁତି ଅଣ୍ପୁ ତଲେ କ୍ରୀସ୍ତ ଜୀସୁ ତାଣାଟି ପାଣ୍ଡୁଝି
 ଆହାମାନାତେଏଁ ଇଞ୍ଜା ମା ତାୟି ତିମତି କରକ୍ତି ଗାଡ଼ାତା ମାନି
 ମାହାପୁରୁତି କୁଲମି ଅଡ଼େ ଆକାୟା ଦେସାତା ମାନି ବାରେ ମାହାପୁରୁ
 ଲକୁତାକି ଆକୁ ରାଡ଼ିମାନମି ।

୨ ମା ଆବା ମାହାପୁରୁ ଅଡ଼େ ପ୍ରୁ ଜୀସୁ କ୍ରୀସ୍ତ ତାଣାଟି
 କାର୍ମାମେହ୍ନାୟି ଇଞ୍ଜା ହିଡ଼ି ମିଙ୍ଗେତାକି ଆୟାପେ ।

ପାଞ୍ଚୁଲ ମାହାପୁରୁଇଁ ଜହରା କିନାୟି

୩ ମା ପ୍ରୁ ଜୀସୁ କ୍ରୀସ୍ତ ଆବା ମାହାପୁରୁକି ଜହରା, ଏଞ୍ଜାସି
 କାର୍ମାମେହ୍ନି ଆବା ଅଡ଼େ ଦୁକୁ ତୁକ୍ନି ମାହାପୁରୁ । ୪ ମାହାପୁରୁ
 ତାଣାଟି ଆମିନି ଦୁକୁ ତୁକ୍ନି ତାଣା ମାରୁ ଦୁକୁ ତୁପ୍କି ଆହିମାନାୟି,
 ଏ ଦୁକୁ ତୁକ୍ନାଣି ତଲେ ଏନିକିହ୍ନି ବାରେ ଲେହେଁତି ଦୁକୁ
 ବେଟାଆହିମାନି ଲକୁଣି ଦୁକୁ ତୁକ୍ନାହିଲି ଆଡ଼ିନାୟି, ଇଦାଆଁତାକି
 ଏଞ୍ଜାସି ବାରେ ଦୁକୁତା ମାଙ୍ଗେ ଦୁକୁ ତୁକ୍ନାଣି ହାହାମାଞ୍ଜାନେସି
 * ଇତିହ୍ନି କ୍ରୀସ୍ତ ତାକି ମାରୁ ଏନିକିହ୍ନି ହାରେକା ଦୁକୁ କସ୍ତ
 ହାରେକା ବେଟାଆନାୟି, ଏଲେକିହ୍ନି ଏ କ୍ରୀସ୍ତ ତାଣାଟି ମାହାପୁରୁତି
 ଦୁକୁ ତୁକ୍ନାୟି ହାରେକା । ୬ ସାମା ମାମ୍ନୁ ଦୁକୁ କସ୍ତ ବେଟାଆଡ଼ିସାରେ
 ଏଡ଼ି ମୀ ତାକି ଦୁକୁ ତୁକ୍ନାୟି, ଅଡ଼େ ଗେଲ୍ପି ଆହାଲିତାକି; ଇଞ୍ଜା
 ମାମ୍ନୁ ଦୁକୁ ତୁପ୍କି ଆତିହ୍ନି, ଏଡ଼ି ମୀ ଦୁକୁ ତୁକ୍ନାହିଲି ତାକି; ମାମ୍ନୁ
 ଏନିଲେହେଁତି ଦୁକୁ କସ୍ତ ବେଟାଆନମି ମୀରୁ ଏନିକିହ୍ନି ସାସା ଅଡ଼େ
 କସ୍ତତଲେ ଦୁକୁ ବେଟାଆହି ମାଞ୍ଜେରି ମାମ୍ନୁ ଜିକେଏ ଏଲେକିହ୍ନି ଏ
 ଦୁକୁ ତୁକ୍ନି କାମା କିହିମାନମି । ୭ ଅଡ଼େ ମୀ ତାଣା ମା ବାସ୍ତୁ ହାରେକା
 ମାନେ । ମୀରୁ ମା ଦୁକୁ କସ୍ତ ପାଣ୍ଡୁନିତାଣା ଏନିକିହ୍ନି ଆଣ୍ଡାମାଞ୍ଜେରି,

ଏଲେକିହିଁ ଏ ମାମ୍ବୁକୁ ତୁକ୍ନି ତାଣା ଆଣ୍ଡିଦେରି, ଇଞ୍ଜିଁ ମାମ୍ବୁ ପୁଞ୍ଜାମାନମି ।

୮ ✧ ଇଚିହିଁ ଏ ତାୟିୟାଁ ଅଡେ ତାଳିମ୍ବାତେରି, ଆସିୟା ରାଜିତା ମାଙ୍ଗେତାକି ଆହାମାନି ସାସ୍ତି ମୀରୁ ପୁନାଆନା ମାଞ୍ଜୁ ଇଞ୍ଜିହିଁ ମାମ୍ବୁ ଅଣ୍ଡି ହିଲଅମି; ମାମ୍ବୁ ମା ବାଡ଼ୁରୁଟି ବେଟାଆହାମାନି ସାସ୍ତି ସହଞ୍ଜି ଆହାଲି ଆଡାଆରେରୁ ଆହାମାଚମି, ଇଞ୍ଜାଁ ମାମ୍ବୁ ନୀତାମାଞ୍ଜାଲି ଜିକେଏ ଆସା ପିସାମାଚମି; ୯ ହାଅ, ମାଙ୍ଗେ ପାୟାଲି ହୁକୁମି ହୀପକି ଆହାମାନେ ଇଞ୍ଜିଁ ଅଣ୍ଡିମାଚମି, ଏନିକିଁ ମାମ୍ବୁ ମା ମୁହେଁ ବାର୍ସୁ କିହାକତାଆନା ଏମିନି ମାହାପୁରୁ ହାକିଟି ନିକ୍ନେସି ଏଞ୍ଜାଣି ତାଣା ବାର୍ସୁ କିନମି; ୧୦ ଏଞ୍ଜାସି ଆଜିହପେତି ହାକିଟି ମାଙ୍ଗେ ଗେଲପାତେସି ଅଡେ ଗେଲପାନେସି, ଅଡେ ତାୟୁ ଜିକେଏ ଗେଲପାନେସି ଇଞ୍ଜିଁ ତାନିତାଣା ମା ଆସା ମାନେ; ୧୧ ମୀରୁ ଜିକେଏ ମା ତାକି ପ୍ରାତାନା କିହାଁ ମାଙ୍ଗେ ସାୟେମି କିହାମାଞ୍ଜାଦେରି, ଏନିକିଁ ମାଙ୍ଗେ ଏମିନି କାର୍ମାତି ଦାନା ହୀପକି ଆହାମାଞ୍ଜାନେ, ଏଦାଆଁତାକି ହାରେକା ଲକୁତି ଗୁତିତି ମା ତାକି ହାରେକା ଜହରା କିଞ୍ଜିଆହିମାନେ ।

ପାଞ୍ଜୁଲ ତାନି ଅଣ୍ଡିପୁ ବାଦଲି କିନାୟି

୧୨ ବାରେକିହାଁ ଦାର୍ତ୍ତିତା ମୀ ତାକି ମାମ୍ବୁ ମାଣ୍ଡସିତି ବୁଦିତଲେ ତାକାଆନା ମାହାପୁରୁତି କାର୍ମାଟି ତାନି ସୁଦୁ ଅଡେ ନାମୁତଲେ ତାକିମାଚମି ଇଞ୍ଜିଁ ମା ଅଣ୍ଡିପୁ ସାକି ହାହିମାଞ୍ଜାନେ, ଇଦି ମା ବତପଣତି କାତା । ୧୩ ଖାର୍ଜ ମୀରୁ ଏନାଆଁ ପଡ଼ଞ୍ଜି ଆହାନା ତେଲ୍‌ହିଦେରି, ଏ ବାରେ ପିସପେ ମାମ୍ବୁ ମିଙ୍ଗେ ଅଡେ ଏନାଆଁ ରାଡିମାଞ୍ଜଅମି, ୧୪ ଅଡେ ମା ପ୍ରୁ ଜୀସୁ କ୍ରୀସ୍ତିତି ଦିନାତା ମାମ୍ବୁ ମୁୀ ତାକି ବତପଣ ତସାଲି ଆଡିନମି, ଅଡେ ମୀରୁ ଜିକେଏ ମା ତାକି ବତପଣ ତସାଲି ଆଡିଦେରି, ମୀରୁ ନୀଏଁ ଇତେକା ପୁଞ୍ଜାନା ବାରେ ପୁନାଆତି ଜିକେଏ ର ଦିନା ମୀରୁ ବାରେ ତାୟୁ ପାତେକା ପୁଞ୍ଜେରି ଇଞ୍ଜିଁ ନା ଆସା ।

୧୫ ଇ କାତା ନେହିଁକିଁ ପୁଞ୍ଜାମାନାକି ମୁଲୁଏ ମୀ ତାଣା ଖାହାଲି ତାକି ନାଙ୍ଗେ ଅଣ୍ଡିପୁ ମାଚେ, ଆଡିହିଁ ମୀରୁ ରୀ ଦେବା ରାହାଁ

ବେଟାଆଡେରିମା ୧୭ ☆ମୀ ତାଣାଟି ମାକିଦନିୟାତା ହାଜାନା ଅଡେ
 ଝେଣ୍ଡେ ମାକିଦନିୟାଟି ମୀ ତାଣା ଝାହାନା ମୀ ସାୟେମି ତଲେ
 ଜୀହୁଦା ଦେସାତା ହାଜାଲି ଆଡ଼ିଇଁ, ଏଦାଆଁତାକି ଏ ନାମୁଟି ତଲିଏ
 ମୀ ତାଣା ହାଜାଲି ମନ କିହାମାଚେଏ । ୧୭ ଆଡିହିଁ ଇଲେତି ଅଣ୍ଠୁ
 ଅଣ୍ଠିନାୟି ନାନୁ ଏନାଆଁ ଆନାମାନା ଆହାନା କିହାମାଚେଏ ? ଇଞ୍ଜା
 ନାନୁ ଏନାଆଁ ତୀରିକିହା ଡୟିଇଁ, ଏଦି ଏନାଆଁ ଏଦାଆଁ ଦାର୍ତତିତି
 ଅଣ୍ଠୁ ତଲେ କିହିମାଇଁ, ଇଞ୍ଜା ନା କାତା “ହାଅ କି ଆଏ” ଇ ରୀ କାତା
 ରଣ୍ଠିଏ ଦେବା ହପୁଇଁ କି ? ୧୮ ମାହାପୁରୁ ଟିକାଣାତାସି, ଏଦାଆଁତାକି
 ନା କାତା ମିଙ୍ଗେତାକି “ହାଅ କି ଆଏ” ଇନି ରୀ କାତା ଆଏ ।
 ୧୯ ☆ଇତିହିଁ କ୍ରୀସ୍ତ ଜୀସୁ ମାହାପୁରୁ ମୀରଏସି, ଆମ୍ବାଆସି ମା ତାଣାଟି
 ଇତିହିଁ ସିଲା, ତିମତି ଅଡେ ନାନୁ ମୀ ତାଣା ଝେକହା ମାତମି,
 ଏଝାସି “ହାଅ” ଅଡେ “ଆଏ” ଇନାସି ଆହାହିଲଅସି, ଇତିହିଁ ଏଝାଣି
 ତାଣା ହାଅ ଆହାମାନେ । ୨୦ ଏନାଆଁତାକି ଇତିହିଁ ମାହାପୁରୁତି
 ବାରେ ଆଞ୍ଜାମାନାୟି ଏଝାଣି ତାଣା “ହାଅ” ମାନେ; ଇଦାଆଁତାକି
 ଜୀସୁ କ୍ରୀସ୍ତ ତାଣାଟି ମାହାପୁରୁଇଁ ଗାଝୁରମି କିହାଲି ମାର “ଆମେନ;’
 ଏଲେଆହିଁ ଆପେ” ଇନାୟି । ୨୧ ତାନୁଏ ମାଙ୍ଗେ ଅଡେ ମିଙ୍ଗେ କ୍ରୀସ୍ତ
 ତାଣା ତୀରି କିହାମାଞ୍ଜାନେସି, ଇଞ୍ଜା ମାଙ୍ଗେ ବର ହାହାମାଞ୍ଜାନେସି,
 ଏଝାସି ମାହାପୁରୁ; ୨୨ ଏଝାସି ତାନି ବୁରୁ ମୁଦ୍ରା ମାଙ୍ଗେ ଝେଟା
 ମାଞ୍ଜାନେସି, ଇଞ୍ଜା ଏଝାସି ମା ହିୟା ବିତ୍ରା ସୁଦୁଜୀଝୁ ସିନାଲେହେଁ
 ହାହାମାଞ୍ଜାନେସି ।

୨୩ ସାମା ନାନୁ ମାହାପୁରୁଇଁ ସାକି କିହାନା ନା ଜୀଝୁତି ମାନି
 କିହିମାଇଁ, ନାନୁ ମିଙ୍ଗେ କାମା ଆହାନା କରକ୍ତିତା ଝେଣ୍ଡେ ହାଜାହିଲଅଁ
 । ୨୪ ମୀ ନାମୁଟି ମୁହେଁ ମା ଅଦିକାରା ମାନେ, ଏଲେକିଁ ଆଏ, ସାମା
 ମୀ ରାହାଁତାକି ମୀ ସାୟେମି କିନାତମି ଆହାମାନମି, ଏଦାଆଁତାକି
 ନାମୁତା ତୀରିଆହାନା ମାଞ୍ଜୁ ।

୨

୧ ନାନୁ ମୀ ତାଣା ହାନାୟି ମିଙ୍ଗେତାକି ଅଡେ ଝେଣ୍ଡେ କସ୍ତ ଆୟେଏ,
 ଇଦାଆଁ ମନତା ତୀରି କିତେଏ । ୨ ନାନୁ ମିଙ୍ଗେ ଦୁକୁ ହିୟାଇଁ,

ଆତିହୁଁ ନାନୁ ଆମ୍ବାଆରାଇଁ ଦୁକୁ ହୀଇଁ, ଏଞ୍ଜାଣି ପିସ୍‌ପେ ନାଙ୍ଗେ ଆମ୍ବାଆସି ରାହାଁ ହିୟାନେସି ? ୩ ଇଞ୍ଜାଁ ନାନୁ ଆମ୍ବାଆରି ତାଣାଟି ରାହାଁ ପାଣ୍ଡନାୟି ମାନେ, ଏଞ୍ଜାରିତାଣା ନାନୁ ଖାହାନା ଏନିକିଁ ଦୁକୁ ବେଟାଆଅଁ, ଏଦାଆଁତାକି ନାନୁ ଇ କାତା ରାଟାମାଟେଏଁ, ଏନାଆଁତାକି ଇତିହୁଁ ନା ରାହାଁତା ମୀ ରାହାଁ ଆନେ, ଏଦି ମୀ ବାରେତାକି ନା ଅଣ୍‌ପୁ । ୪ ଇତିହୁଁ ହାରେକା କସ୍ତୁ ଅଡେ ହିୟାଁ କାଡାତାକି ହାରେକା ଦୁକୁ ତଲେ କାଣ୍ଡୁ ଡୁକ୍‌ହିହୁଁ ମିଙ୍ଗେ ରାଟାମାଞ୍ଜାତେଏଁ; ଏନିକିଁ ମୀରୁ ଦୁକୁ ଆଦେରି, ଏଲେକିଁ ଆଏ, ସାମା ମିଙ୍ଗେତାକି ନା ଜୀଞ୍ଜୁନନାୟି ହାରେକା ମାନେ, ଇ କାତା ମୀରୁ ଏନିକିଁ ପୁଞ୍ଜେରି ।

ମାଣ୍‌ସିତି ଦହ ମ୍ଲେକ୍‌ନାୟି

୫ ସାମା ଆମ୍ବାଆସି ଦୁକୁ ହୀହାମାନେସି, ଏଞ୍ଜାସି ନାଙ୍ଗେ ଦୁକୁ ହୀହାମାଞ୍ଜାଅସି, ସାମା ବାରେତେରି ମିଙ୍ଗେ ଦୁକୁ ହୀହାମାଞ୍ଜାନେସି ନାନୁ ହାରେକା ଗାଡିକିହୁଁ ଝେହୁଅଁ । ୬ ମୀ ବିତ୍ରାଟି ହାରେକା ଲକୁ ତାଣାଟି ଏଞ୍ଜାସି ଏନି ତଣ୍ଡୁ ବେଟା ଆହାମାନେସି ଏଞ୍ଜାଣାକି ଏରେକେଏ ସାରି । ୭ ଏଦାଣିତାକି ଏଲେତି ଲକୁ ଏରେତା ହାରେକା ଦୁକୁତା ମେଦା ହାନେସି, ଏଦାଆଁତାକି ମୀରୁ ନାଏଁ ଏଞ୍ଜାଣାଇଁ ପାପୁ ମ୍ଲେକ୍‌ହାନା ବାସୁଁ ହୀଦୁ । ୮ ଇତିହୁଁ ଏଞ୍ଜାଣାଇଁ ଜୀଞ୍ଜୁ ନନାଣି ତହୁଦୁ ଇଞ୍ଜିଁ ବାତିମାଲିମାଞ୍ଜାଇଁ । ୯ ଇତିହୁଁ ମୀରୁ ବାରେ କାତାତି ମାନୁଞ୍ଜି ଆହିମାଞ୍ଜେରି, ଇଞ୍ଜିଁ ମିଙ୍ଗେତାକି ଏମ୍ବାତି ପାରମାଣା ଏନିକିଁ ନାନୁ ବେଟାଆଇଁ, ଇ ବାରେତାକି ରାଟାମାଟେଏଁ । ୧୦ ଇଞ୍ଜାଁ ମୀରୁ ଆମ୍ବାଆରି ଦହ ପିହୁଦେରି, ନାନୁ ଜିକେଏ ଏଞ୍ଜାଣି ଦହ ପିହୁଇଁ; ଇତିହୁଁ ନାନୁ ଏନାଆଁ ଦହ ପିସାମାଇଁ, ଇଞ୍ଜାଁ ଏନିନି ଦହ ପିସାମାଇଁ, ଏଦାଆଁ କ୍ରୀସ୍ତତି ନକିତା ମୀ ତାକି ପିସାମାଇଁ । ୧୧ ଏନିକିଁ ସୟତାନ ମାଙ୍ଗେ ଲାଗେଏ କିହାଲି ପାରୁ ବେଟାଆଏ, ଇତିହୁଁ ମାର ବାରେ ତାନି ଅଣ୍‌ପୁତି ପୁଞ୍ଜାମାନାୟି ।

ତ୍ରୟାତା ପାଞ୍ଜୁଲ ମନତା କସ୍ତୁ ପାଣ୍ଡନାୟି

୧୨ *ଅଡେ କ୍ରୀସ୍ତତି ନେହୁଁ କାରୁ ଝେକ୍‌ହାଲି ତାକି ନାନୁ ତ୍ରୟାତା ଖାଡି ତାୟୁ ପ୍ରବୁତି କାମା କିହାଲି ଦାରା ଦେପି ଆହାମାଟି ଜିକେଏ,

☆ ୨:୧୨ ୨:୧୨ କାମା ୨୦:୧

୧୩ ନାନୁ ନା ତାୟି ତିତସଇଁ ଏନାଆଁ ମେହୁଆଲିଏ ନା ଜୀଝୁ ହିତଡ଼ି ଆଆତାକି ଏଝାରି ତାଣାଟି ହେଲ ବେଟାଆହାନା ମାକିଦନିୟାତା ହାଚେର୍ଏ ।

କ୍ରୀସ୍ତ ତାଣାଟି ଜୀଣା ଆନାୟି

୧୪ ସାମା ମାହାପୁରୁଇଁ ଜହରା ଆପେ, ଏଝାସି ବାରେବେଲା ମାଙ୍ଗେ ଅହାନା କ୍ରୀସ୍ତ ତାଣା ଜୀଣାଆଡ଼ି ଲେହେଁ ହାଜାମାନେସି, ଇଞ୍ଜା ବାରେ ଚାୟୁତା ତାନି ବୁଦି ଲେହେଁତି ଗାନ୍ଦା ମା ତାଣାଟି ଝେକହିମାନେସି । ୧୫ ଇତିହିଁ ଗେଲପି ଆହିମାନି ଲକୁତାଣା ଇଞ୍ଜା ନାସା ଆହିମାନି ଲକୁତାଣା ମାର ମାହାପୁରୁ ନକିତା କ୍ରୀସ୍ତତି ହାରେକା ନେହିଁ ଗାନ୍ଦା ଲେହେଁ ଆହାମାନାୟି । ୧୬ ରକଝାକି ଲକୁତାକି ହାକି ହାନାୟି ଅଡ଼େ ରକଝାକି ଲକୁତାକି ଜୀଝୁହାନି ଲେହେଁତି ନେହିଁ ଗାନ୍ଦା ଲେହେଁ । ସାମା ଇ ବାରେ କାମା କିହାଲି ଆମ୍ବାଆସି ଆଡ଼ିନେସି ? ୧୭ ହାରେକା ଲକୁ ବାଡ଼କାଲି ତାକି ମାହାପୁରୁତି କାରୁ ଝେକହି ମାନେରି, ମାମ୍ବୁ ଏଝାରିଲେହେଁ କିହିଲଅମି, ସାମା ତୀରପୁତଲେ ମାହାପୁରୁତି ହୁକୁମି ତଲେ ତାନି ନକିତା ମାମ୍ବୁ କ୍ରୀସ୍ତ ତାଣା ମାଞ୍ଜାନା କାତା ଜଲିମାନମି ।

୩

ପୁଃନି ମେରାତି ହଲିୟା

୧ ମାର କି ଜାହାରାଇଁ ବଡ଼ପଣ କିହାଲି ମାଟ୍‌ହା ମାନାୟି ? ଆମ୍ବା ଆମ୍ବାଆରି ଲେହେଁ ଏନାଆଁ ମୀ ତାଣା ଆଆଡ଼ି ମୀ ତାଣାଟି ମା ତସ୍‌ପି ଆନାୟି ଲଡ଼ାମାନେ ? ୨ ମୀରୁତ ମା ହିୟାତା ରାସ୍‌କି ଆହାମାନାତେରି ଇଞ୍ଜା ବାରେଜାଣା ପୁଞ୍ଜାମାନାୟି ଅଡ଼େ ପଡ଼ଝି ଆହାମାନି ମା ଆକୁ ଲେହେଁ; ୩ ଅଡ଼େ, ମୀରୁ ମା ସେବା କାମାତା ରାସ୍‌କି ଆହାମାନି କ୍ରୀସ୍ତତି ଆକୁ ଲେହେଁ, ଇଦି ତଞ୍ଜା ଆହିମାନେ; ଏଦି ସୀରା ତଲେ ରାସ୍‌କି ଆହାହିଲେଏ, ସାମା ଜୀଝୁତି ମାହାପୁରୁତି ସୁଦୁଜୀଝୁ ତଲେ ରାସ୍‌କି ଆହାମାନେ, ଝାଲି ପାଟାତା ଆଏ, ସାମା ଉୟୁଗାଟି ହିୟା ପାଟାତା ।

୪ କ୍ରୀସ୍ତ ତାଣାଟି, ମାହାପୁରୁ ନକିତା ବାର୍ସୁ ଇଚାନା ମାଦି ଇଲେତି ଆଟ୍‌ଝା ନାମୁ ମାନେ । ୫ ମାର ମା ତାଣାଟି ଏନାଆଁ କିହାଲି ଆଡ଼ାଆୟି, ଏଲେକିଁ ଆଏ, ସାମା ମାହାପୁରୁ ତାଣାଟି ଆଡ଼ିନି ବାଡ଼ୁ ମାନେ; ୬ ଏଝାସି ମାଙ୍ଗେ ରାସ୍‌କି ଆହାମାନି ମେରାତି ସେବା କିନାରି

କିହାମାଞ୍ଜଅସି, ସାମା ନେହଁ ଜୀଝୁଟି ଇଚିହଁ ପୁଃନି ମେରାତି ସେବା କାମା କିହାଲି ବାଡ଼ୁୟୁ ହାହାମାଞ୍ଜାନେସି; ଇଚିହଁ ରାସ୍‌କି ଆହାମାନି ରାଜିମାନା ହାଝିକିନେ ସାମା ନେହଁ ଜୀଝୁ ନୀତିକିନାୟି ।

୭ ଅଡ଼େ ତୀସ୍‌ତି ଝାଲି ପାଟାତା ରାସ୍‌କି ଆହାମାନି ହାଝି କିନି ମସା ମେରାତି ସେବା କାମା ଇଲେତି ଗାଝୁରମି ତଞ୍ଜାଆହାମାଚେ, ଇଚିହଁ ଇସାୟେଲ ଲକୁ ମସା ମୁମୁଡ଼ି ନାସା ଆନି ଉଜେଡ଼ି ତାକି ଏଝାଣି ମୁମୁ ମେସାଲି ଆଡ଼ାଆତେରି, « ଆତିହଁ ନେହଁ ଜୀଝୁଟି ସେବା କାମା ଏଚେକା ଗାଡ଼ି ଗାଝୁରମି ଆଏକି ? » ଓ ତଣ୍ଡ ଆଝିକିନି ସେବା କାମା ଗାଝୁରମି ଗାଟାୟି, ଆଡ଼େ ଦାମୁତି ସେବା କାମା ଏଦାଆଁ କିହଁ ଆଗାଡ଼ା ଗାଝୁରମି ଗାଟାୟି ଆଚେ । ୧୦ ଇଚିହଁ ଆମିନି ଗାଟାୟି ଗାଝୁରମି ଗାଟାୟି ମାଚେ, ଏଡ଼ି ଏଦାନି କିହଁ ଆଗାଡ଼ା ଗାଝୁରମି ଆନି କିହଁ ଗାଝୁରମି ହିଲାଆଗାଟାୟି ଆଚେ । ୧୧ ଗାଡ଼େକା ତାକି ନାସା ଆନାୟି ଗାଝୁରମି ବେଟାଆହଁ, କାଲାକାଲା ତାକି ମାନାୟି ଏଚେକା ଆଗାଡ଼ା ଗାଝୁରମି ତଞ୍ଜାଆଚେ ।

୧୨ ଇଚିହଁ ମାଜେ ଏଲେତି ବାସ୍‌ତୁ ମାନାକି ହାଚେକା ସାସା ଆହାମାନମି । ୧୩ ଅଡ଼େ ଇସାୟେଲ ଲକୁ ଏନିକଁ ଗାଡ଼େକା ତାକି ନାସାଆନି ଗାଝୁରମିତି ସିନିକିଅରି, ଏଦାଆଁତାକି ମସା ଏନିକଁ ତାନି ମୁମୁଡ଼ି ହିମ୍ବରି ପୁକ୍‌ହା କଡ଼ିମାଚେସି, ମାମୁ ଏଲେକଁ କିହିହିଲଅମି । ୧୪ ସାମା ଏଝାରି ବୁଦିତି କାଶକା ପଜ୍‌ଝି ଆହାମାନୁ, ଇଚିହଁ ନୀଞ୍ଜୁପାଚେକା ପୁଃଞ୍ଜ ରାଜିମାନା ପତି ପଡ଼ଝି ଆନାଟି ଏ ହିମ୍ବରି ପିଡ଼ଗିନାୟି ନୀଏ ପାଚେକା ତୁୟାମାନେ, ଇଞ୍ଜା କ୍ରୀସ୍‌ତା ଡାଣାଟି ଏ ହିମ୍ବରି ଗୁଟା ଆହାମାନେ, ଏଡ଼ି ତଞ୍ଜା ଆହିହିଲେଏ । ୧୫ ସାମା ନୀଏ ପାଚେକା ମସାତି ମେରା ପଡ଼ଝି ଆନାଟି ଏଝାରି ହିୟାଁ ହିମ୍ବରି ପୁପ୍‌କି ଆହଁ ତୁୟିନେ । ୧୬ “ସାମା ଆମ୍ବାଆସି ଆଚେସି ପ୍ରବୁ ଝାକି ଝେଣ୍ଡାଝାଡ଼ିହଁ ଏଝାଣି ପୁପ୍‌କି ଆହାମାନି ହିମ୍ବରି ଗୁଟାଆଚେ ।” ୧୭ “ପ୍ରବୁ” ଏ ଜୀଝୁ, ଇଞ୍ଜା ଏମ୍ବିୟା “ପ୍ରବୁଟି ଜୀଝୁ” ମାନେ ଏମ୍ବାଆଁ ବାରେ ମେଲା ଆନାୟି ମାନେ । ୧୮ ସାମା ମାର ବାରେତାୟି ମୁମୁ ପୁକ୍‌ଆନା ଦାପେଣିତା ମେହ୍‌ନି ଲେହେଁ ପ୍ରବୁଟି ଗାଝୁରମି ମେସି

ମେସିହିଆଁ ଗାଓରମିଟି ହାରେକା ଗାଓରମି ଆହାନା ତାନି ଏ ଖାଣା ତଲେ ବାଦଲି ଆହିମାନାୟି; ଇଞ୍ଜା ପ୍ରବୁ ଆମ୍ବାଆସିକି ଜୀଓୁ ଏଓାଣି ତାଣାଟି ଇ ବାରେ ଆହିମାନେ ।

୪

ଇରଥା ଡକା ବିତ୍ତା ନେହିଁ ଜୀଓୁତି ଦନ

୧ ମାର ମାହାପୁରୁତି କାର୍ମା ବେଟାଆହାନା ଇ ସେବାକିନି ପାଣା ବେଟାଆହାମାନାକି ସାସା ହିଲାଆ ଲକୁଲେହେଁ ଆହାହିଲାଆୟି, ୨ ସାମା ମାମ୍ବୁଲାଇ ଗାଟି ତଞ୍ଜା ଆଆଗାଟି ଲାଗେଏତି କାମା ପିସାମାନମି; ଇଞ୍ଜା ମାମ୍ବୁ ନାଡ଼ି କିଅମି ଅଡେ ମାହାପୁରୁ କାତାଟି ମିଟି କାଲହାନା ଖେସିହିଲଅମି, ମାହାପୁରୁ କାନୁତା ନେହିଁ କାରୁତି ସାତା କିହିଁ ଖେକହାନା ବାରେଜାଣାତି ନେହିଁ ଅଣ୍ପୁ ତାକି ନେହାଁତମି ତଞ୍ଜା ଆହିମାନମି । ୩ ଏନାଆଁତାକି ଇତିହିଁ ମାର ଖେକହାନା ନେହିଁ କାରୁ ଡଗୁା ମାଟିହିଁ, ଏଡ଼ି ଖାରଇ ଜାଙ୍ଗା ମାନାରାକି ଡଗୁାମାନେ । ୪ ମାହାପୁରୁ ଖାଣା ଲେହେଁତି କ୍ରୀସ୍ତ ତାନି ଗାଓରମିଗାଟି ନେହିଁ କାରୁତି ଉଜେଡ଼ି ଏନିକିଁ ଇଲେତି ଲକୁକି ତଞ୍ଜା ଆଏ, ଏନାଆଁତାକି ନାମାଆଗାଟାରି ବୁଦି ଦାରତିତି ପଲ୍ଲଆ ପେନୁ କାଣାୟାଁ କିହାମାନେ । ୫ ମାମ୍ବୁ ମୁାଙ୍ଗେତାକି ଖେସାକତିହିଲଅମି, ସାମା କ୍ରୀସ୍ତଇଁ ପ୍ରବୁ ଇଞ୍ଜାଁ ଅଡେ ଜୀସୁ କ୍ରୀସ୍ତ ତାକି ଜାହାରାଇଁ ମୀ ହଲିୟାଙ୍ଗାତମି ଇଞ୍ଜାଁ ଖେକହି ମାନମି, ୬ ଏନାଆଁତାକି ଇତିହିଁ ଆମିନି ମାହାପୁରୁ ଏଲେଇଞ୍ଜାମାରେସି, “ଆଦେରିଟି ଉଜେଡ଼ି ତଞ୍ଜା ଆପେ,” ଏଓାସି କ୍ରୀସ୍ତତି ମୁମ୍ବୁ ତଞ୍ଜା ଆହିମାନି ମାହାପୁରୁତି ଗାଓରମିଗାଟି ବୁଦିତି ଉଜେଡ଼ି ତସାଲି ତାକି ମା ହିୟାଁତି ଉଜେଡ଼ି କିହାମାନେସି ।

୭ ସାମା ମାର ଖାରଇ ଇରଥା ଡକାତା ଇ ଲାକପୁରୁତି ଦନ ବେଟାଆହାମାନାୟି । ଇମ୍ବାଆଁ ପୁଣ୍ଡି ଆହିମାନେ ଇଲେତି ଲାକପୁରୁତି ବାଡ଼ମ୍ବୁ ମାଦି ଆଏ ସାମା ମାହାପୁରୁଖାୟି । ୮ ମାମ୍ବୁ ବାରେଲେହେଁତି ଦୁକୁ କସ୍ତ ବେଟାଆହାମାନମି, ସାମା ମାମ୍ବୁ ସୁଣ୍ଡି ଆହି ହିଲଅମି । ଏଚେ ଏଚେଲା ଆତାଜାକା ଆଡ଼ି ଜିକେଏ ନୀରାସା ଆହାହିଲଅମି । ୯ ମାମ୍ବୁ ସାସ୍ତି ବେଟା ଆହିମାନମି ସାମା ମାହାପୁରୁ ମାଙ୍ଗେ ଏଚେଲା ପିସାମାଞ୍ଜଅସି । ଏଚେ ଏଚେକା ମାଡ଼ା ବେଟାଆହି

ମାନମି ସାମା ନାସା ଆହାହିଲଅମି । ୧୦ ଜୀସୁତି ଜୀଝୁ ଏନିକିଁ ମା । ତାଣା ତଞ୍ଜାଆନେ, ଏଦାଆଁତାକି ମାର ବାରେ ବେଲା ମା ଆଙ୍ଗାତା ଜୀସୁତି ହାକି ତେକା ମାନାୟି । ୧୧ ଇତିହିଁ ଜୀସୁତି ଜୀଝୁ ଏନିକିଁ ମା ହାନି ଆଙ୍ଗାତା ତଞ୍ଜାଆନେ, ଏଦାଆଁତାକି ମାର ନୀତାମାତି ଜିକେଏ ବାରେବେଲା ଜୀସୁତି କସମି ହାକିତା ହେରପି ଆହିମାନାୟି । ୧୨ ଇଲାଆହିଁ ମା ତାଣା ହାକି, ଅଡେ ମୀ ତାଣା ଜୀଝୁ କାମା କିହିମାନେ ।

୧୩ ରାସକି ଆହାମାନେ, “ନାନୁ ନାମିତାକି ଜଲିତେଏଁ ।” ମାର ଏ ନାମୁତି ଜୀଝୁ ବେଟାଆହାମାନାୟି, ଇଞ୍ଜା ମାର ନାମାମାନାୟି ଏଦାଆଁତାକି ଝେକ୍‌ହି ଜିକେଏ ମାନାୟି । ୧୪ ମାମ୍‌ସୁ ପୁଞ୍ଜାମାନମି, ମାହାପୁରୁ ପ୍ରବୁ ଜୀସୁଇଁ ହାକିତି ଝେଣ୍ଡେ ନିକ୍‌ହାମାନେସି । ଏ ମାହାପୁରୁ, ଜୀସୁତଲେ ମାଙ୍ଗେ ଜିକେଏ ନିକ୍‌ହାନେସି ଅଡେ ମୀ ତଲେ ମାଙ୍ଗେ ତାନି ତାଗେ ଅୟାନେସି । ୧୫ ମୀ ନେହେଁତାକି ଇ ବାରେ ଆହିମାନେ । ମାହାପୁରୁତି କାର୍ମାମେହନାୟି ଅଡେ ହାରେ ଗାତି ପାତାଆହାନା ଲକୁଣି ତାଗିତେ, ଅଡେ ହାରେକା ଲକୁ ରାହାଁ ଅଣ୍‌ପୁ ତଲେ ମାହାପୁରୁଇ ଗାଝୁରମି କିନେରି ।

ନାମୁତି ଜୀଝୁ

୧୬ ଏଦାଆଁତାକି ମାମ୍‌ସୁ ଝାହା ହିଲଅମି, ସାମା ମା ଦାରତିତି ଆଙ୍ଗା ମେଣ୍‌ଜିତି ଜିକେଏ ମା ହିୟା ବିତ୍ରାତି ଜୀଝୁ ପୁଞ୍ଜନାୟି ଆହିମାନେ । ୧୭ ଇତିହିଁ ଇ ଗାଡେକାତି କସୁ ହାରେକା ଗାତି ମାଙ୍ଗେ ତାକି କାଲାକାଲା ରାଆଗାଟି ଗାଝୁରମି ତାନେ; ୧୮ ମାର ତଞ୍ଜା ଆହିମାନାଣି ଗୁରି କିଆନା ତଞ୍ଜା ଆଆଗାଟାଣି ଗୁରି କିହିମାନାୟି; ଇତିହିଁ ତଞ୍ଜା ଆହିମାନାୟି ଗାଡେକା ତାକି, ସାମା ତଞ୍ଜା ଆଆଗାଟାୟି କାଲାକାଲାତାୟି ।



୧ ମାର ପୁଞ୍ଜାମାନାୟି, ଆମିନି ଦାରତିତି ତୁମ୍‌ ଲେହେଁତି ଇଲୁତା ନୀଏଁ ମାର ବାସା କିହାମାନାୟି, ଏଦି ନସୁ ଆଡିସାରେ ମାହାପୁରୁ ମାଙ୍ଗେ ଲାକପୁରୁ ର କାଲାକାଲାତି ଇଲୁ ମେଡି କିୟାନେସି । ଏଦି ମାଣ୍‌ସି କେୟୁଟି କେପିତାୟି ଆଏ, ମାହାପୁରୁ ତାନୁଏ ଏଦାନି

ଗାଡ଼ିକିତାସି ।^୭ ଇ ଦାର୍ତ୍ତିତ ଇଲୁତା ମାଞ୍ଜାନା ମାର ଲାକପୁରୁ ଇଲୁତି ହିମ୍ବର ହୁଚାଲି ମନ କିହାନା ଡାହି ମାନାୟି ।^୮ ସାମା ଲାକପୁରୁତି ବାସା ଚାୟୁତା ହଟିସାରେ ମାର ଆଙ୍ଗା ହିଲାଆଗାଗାତାୟି ଆଆନା ନାଗଡ଼ା ତଞ୍ଜା ଆଆୟି ।^୯ ଇତିହିଁ ମାର ଇ ଦାର୍ତ୍ତିତ ତୁମୁତା ବାସା ଆହାନା ବଜୁଗାଟି ହିୟା ତଲେ ଡାହି ମାନାୟି; ଇତିହିଁ ମାର ଦାର୍ତ୍ତିତ ଆଙ୍ଗା ପିସାଲି ଅଶ୍ପିମାନାୟି ଏଦି ଆଏ, ସାମା ଜୀଝୁ ଏନିକିଁ ଦାର୍ତ୍ତିତ ନାସାକିନେ, ଇଦାଆଁତାକି ଇ ହାନି ଆଙ୍ଗାତି ମୁହେଁ ଲାକପୁରୁତି ହିମ୍ବର ହୁଚାଲି ମାର ମନ କିହିମାନାୟି ।^{୧୦} ମାହାପୁରୁ ମାଙ୍ଗେ ଇ ବାଦଲଝି ଆନାଣି ତାକି ତିୟାରା କିହାଁ ମାଞ୍ଜାନେସି । ଅଡ଼େ ଇଦାଣି ତୀର୍ପୁକିନାଣି ଲେହେଁ ତାନି ସୁଦୁଜୀଝୁ ଏଝାସି ମାଙ୍ଗେ ହାହାମାଞ୍ଜାନେସି ।

^{୧୧} ଏଦାଆଁତାକି ମାମ୍ବୁ ବାରେବେଲା ସାସା ଆସାମାନମି । ମାମ୍ବୁ ପୁଞ୍ଜାମାନମି, ଏତରଦିନା ପାତେକା ଇ ଆଙ୍ଗାତା ବାସା କିହାମାନମି, ଏତରଦିନା ପାତେକା ପ୍ରବୁତି ଇଲୁତି ହେକ ମାଞ୍ଜାନା ନୀତା ବାଡ଼କିମାନମି,^{୧୨} ଏନାଆଁତାକି ଇତିହିଁ ମାର ତଞ୍ଜାଆହିମାନି ଦିଶ୍ପୁ ଲାକ ଆଏ ସାମା ନାମ୍ବୁ ଲାକ ନୀତା ବାଡ଼କି ମାନାୟି ।^{୧୩} ଏନାଆଁକି ଇତିହିଁ ମାମ୍ବୁ ସୁାସା ଗାଗାତମି, ଇଞ୍ଜା ଇ ଆଙ୍ଗା ପିସାନା ପ୍ରବୁ ତଲେ ବାସା କିହାଲି ମାମ୍ବୁ ହାରେକା ରାହାଁ ।^{୧୪} ଏଦାଆଁତାକି ଇମ୍ପାଆଁ ଜାହାରା ଇଲୁତା ମାତିହିଁ କି ହେକ ରାଜି ମାତିହିଁ ଜିକେଏ, ମାହାପୁରୁଇଁ ରାହାଁ କିନାୟି ଏ ମା ରଣ୍ଡିଏ ଅଶ୍ପୁ ।^{୧୫} ଇତିହିଁ ନେହେଁ ଆପେ କି ଲାଗେଏ ଆପେ, ବାରେଜାଣା ଜାହାରା ଆଙ୍ଗା ତଲେ କିତି କାମାତି ଲେକାତଲେ ପାଡ଼େୟି ବେଟାଆହାଲି ତାକି କ୍ରୀସ୍ତତି ନୀହାଁୟି କିନି ଚାୟୁ ନକିତା ବାରେତାୟି ମାଙ୍ଗେ ନିକା ହାଜାଲି ଆନେ ।

କ୍ରୀସ୍ତ ତାଣାଟି ମାହାପୁରୁତି ତଢ଼େସିଙ୍ଗା ଆନାୟି

^{୧୬} ପ୍ରବୁଇଁ ଆଜିନାଣି ପୁଞ୍ଜାମାନାକି ମାମ୍ବୁ ମୁାଶ୍ପିୟାଁଇଁ ମାଡ଼ଝିକିହି ମାନମି, ସାମା ମାମ୍ବୁ ମାହାପୁରୁ ନକିତା ତଞ୍ଜା ଆହାମାନମି ଇଞ୍ଜା ମୀ ଅଶ୍ପୁତା ଜିକେଏ ତଞ୍ଜା ଆହାମାନମି, ଇ କାତା ନାନୁ ଆସା କିହିମାଇଁ ।^{୧୭} ମାମ୍ବୁ ମୀ ତାଣା ଅଡ଼େ ବଡ଼ପଣ ତସାଲି କିହିହିଲଅମି, ସାମା ଲକ୍ଷ୍ମି ନେହିଁ ଅଶ୍ପୁ ତାକି ବଡ଼ପଣ ତହୁଆନା ଝାରଇ ଏଝାରି

ଆଜ୍ଞାତି ରାହାଁତାକି ବଡ଼ପଣ ତହୁନାରାଇଁ ମୀରୁ ଖେଣ୍ଡେ ଖେସାଲି ଆଡ଼ିଦେରି, ଏଦାଆଁତାକି ମୀରୁ ମା ତାକି ବଡ଼ପଣ ତସାଲି ଆଡ଼ିଦେରି ଇଞ୍ଜିଁ ଖେସିମାଞ୍ଜାନମି । ୧୩ ମାମ୍ମୁ କି ବୁଦି ହିଲାଆ ଗାଟାତମି ? ଏଦି ମାହାପୁରୁ ତାକି ଆହାମାନେ ମାମ୍ମୁ କି ବୁଦିଗାଟାତମି ଆହାମାନମି ? ମା ନେହେଁ ମାଟିସାରେ, ମୀ ତାକି ଏଲେଆହୁଁ ମାନମି । ୧୪ ଇତିହୁଁ କ୍ରୀସ୍ତତି ଜୀଝୁ ନନି ତାଣାଟି ସାଲୁଝି ଆହିମାନାୟି, ଏଦାଆଁତାକି ମାରୁ ଇ କାତା ଅଣ୍ଠିମାନାୟି, ରଅସି ବାରେଜାଣା ତାକି ହାହାମାନାକି ବାରେଜାଣା ଏ ହାକିତା ଆଣ୍ଡାମାନେରି । ୧୫ ଏଝାସି ବାରେଜାଣା ତାକି ହାହାମାନାକି ଆମିନି ଗାଟାରି ନୀତାମାନେରି, ଏଝାରି ଅଡ଼େ ଜାହାରାତାକି ନୀତାଆନା ଏଝାଣି ତାକି ନୀତିନେରି, ଏନାଆଁତାକି ଇତିହୁଁ ଏଝାରି ତାକି ଏଝାସି ହାହାନା ଖେଣ୍ଡେ ନୀତାମାନେସି ।

୧୬ ଇଦାଆଁତାକି ମାମ୍ମୁ ଆମ୍ବାଆରାଇଁ ମାଣ୍ଠସି ଅଣ୍ଠପୁ ତଲେ ବିଚାରା କିହିଲଅମି । ଦିନା ମାଟେ ଏତିବେଲା ମାମ୍ମୁ କ୍ରୀସ୍ତୁଇଁ ଜିକେଏ ମାଣ୍ଠସି ଅଣ୍ଠପୁ ତଲେ ଅଣ୍ଠିମାଟମି, ସାମା ନୀଏଁ ମାମ୍ମୁ ଅଡ଼େ ଏଲେ କିହିହିଲଅମି । ୧୭ ଇଦାଆଁତାକି ଆମ୍ବାଆସି କ୍ରୀସ୍ତ ତାଣା ମାଟିସାରେ ଆତିହୁଁ ଏଝାସି ପୁଝନାସି ଆନେସି । ପାଣ୍ଡାଆୟି ବାରେ ମେଣ୍ଡାମାନେ, ମେହୁଦୁ ପୁଝନାୟି ଆହା ଆନେ । ୧୮ ଇ ବାରେ ମାହାପୁରୁ ତାଣାଟି ଆହାମାନେ, ଏଝାସି କ୍ରୀସ୍ତ ତାଣାଟି ମାଙ୍ଗେ ତାନିତଲେ ଅଡ଼େ ଆଟୁହା ମାଞ୍ଜାନେସି ଇଞ୍ଜାଁ ତାନିତଲେ ସେବାକିନି ପାଣା ଆଟୁହାଲି ଏଝାସି ମାଙ୍ଗେ ଦାୟିପତି ହାହାମାଞ୍ଜାନେସି । ୧୯ ଏ ଆଣ୍ଡିନି ବଲୁ ଇଦି, ମାହାପୁରୁ କ୍ରୀସ୍ତ ତାଣା ଦାରତିତି ତାନିତଲେ ଆଟୁହାମାଟେସି; ଏଝାସି ଦାରତିତି ଲକୁତି ଦହ ଆହୁଆନା ଏ ଆଣ୍ଡିନି ବଲୁତି ମା ତାଣା ହେର୍ପା ମାଞ୍ଜାନେସି ।

୨୦ ଏଦାଆଁତାକି ମାହାପୁରୁ ମା ଝାକିଟି ହାଟିମାଞ୍ଜାନାକି ମାରୁ କ୍ରୀସ୍ତତି ଝାକିଟି ରାଜାତି କାରୁ ଖେହନାତାୟି ଆହାମାନାୟି; କ୍ରୀସ୍ତ ତଲେ ମାରୁ ବାତିମାଲି ମାଞ୍ଜାନମି, ମାହାପୁରୁ ତଲେ ଅଡ଼େ ଆଣ୍ଡାଦୁ । ୨୧ ଇତିହୁଁ କ୍ରୀସ୍ତକି ଇଚାୟି ପାପୁ ହିଲାଆତି ଜିକେଏ, ମାହାପୁରୁ ତାଙ୍ଗେ ମା ତାକି ପାପୁ ଗାଟାଣିଲେହେଁ କିତେସି, ମାରୁ ଏନିକି ତାନିତଲେ ଆଣ୍ଡାନା ମାହାପୁରୁତି ଦାର୍ମୁତା ଆଣ୍ଡାଲି ଆଡ଼ିନାୟି ।



୧ ମାହାପୁରୁ ତଳେ ଆଶୁଓ ଆହାନା କାମା କିହିମାନାକି ମାମ୍ମୁ ମିଙ୍ଗେ
 ବାଡ଼ିମାଲି ମାଞ୍ଜାନମି, ମୀ ଜୀଝୁତା ମାହାପୁରୁତି କାର୍ମାମେହନାଣି
 ଉଦେଏ କିଆଦୁ । ୨ ମାହାପୁରୁ ଏଲେଇଞ୍ଜି ମାନେସି,
 “ମିଙ୍ଗେତାକି କାର୍ମା ମେସ୍ତାନି ଦିନା ଝାହାଲିଏ ନାନୁ ମୀ ଗହାରା
 ଝେଚେଏଁ,

ଗେଲ୍ପିନି ଦିନା ନାନୁ ମୀ ସାୟେମି ଆୟାତେଏଁ”
 ମେହଦୁ ! ଇଦି ଆହିମାନେ ମାହାପୁରୁତି କାର୍ମାମେହନାଣି ବେଟାଆନ୍ତି
 ବେଲା । ନୀଞ୍ଜୁ ଆହିମାନେ ଗେଲ୍ପିଆନ୍ତି ଦିନା ।

୩ ଏନିକ୍ ମା ସେବା କାମା ନିନ୍ଦା ଆଏ, ଏଦାଆଁତାକି ମାମ୍ମୁ
 ଆମ୍ମାଆରି କାମାତା ବାଦା ହାଆପ ଇଞ୍ଜି ଅଣପିମାନମି ।
 ୪ ଏଦାଆଁତାକି ମାମ୍ମୁ ବାରେବେଲା ମାହାପୁରୁତି ସେବା କିନାରା
 ଲେହେଁ ତସାକଡ଼ିମାନମି, ସାମା ଆଟ୍ଝା ତଳେ ବାରେଲେହେଁତି
 ବାଦାତା, ହିଲାଆ ବେଲାତା କସ୍ତୁ ଅରହିମାନମି, ୫ ମାମ୍ମୁମାଡ଼ା
 ବେଟାଆହାନା, କାୟିଦିତା, ଲକୁ ନକିତା ନିନ୍ଦା ବେଟାଆହାନା, ଇଞ୍ଜା
 ଝାହୁ କାମାତା, ଇଦା କିଆନା, ରାନ୍ଦା ତିନାଆନା ମାଚମି, ୬ ସୁଦୁଟି,
 ବୁଦିଟି, ଅରହିନି ତାଣାଟି, କାର୍ମାମେହନି ତାଣାଟି, ସୁଦୁଜୀଝୁତା, କୁଟୁ
 ହିଲାଆନା ଜୀଝୁନନାୟି, ୭ ଅଡ଼େ ସାତା ନେହଁ ବଲୁତା, ମାହାପୁରୁତି
 ବାଡ଼ୁତୁ ତଳେ, ଟିଝନି ଚେବୁ କେୟୁଟି ଦାମ୍ମୁତି ସାକୁ ତଳେ, ୮ ଗାଝୁରମି
 ଅଡ଼େ ଅପାଆ ତାଣା, ମାମ୍ମୁମାନ୍ତି ବେଟାଆହି ମାନମି ଇଞ୍ଜା ଲାଜା
 ବେଟାଆହି ମାନମି; ଇଞ୍ଜା ନାଡ଼ିକିଓ ଆହିମାନମି, ଆଡ଼ିଜିକେଏ
 ସାତା ଗାଟାତମି । ୯ ପୁଣ୍ଡି ଆଆତି ଲକୁ ଲେହେଁ, ଆଡ଼ି ଜିକେଏ
 ନେହଁ ପୁଣ୍ଡିଆଡ଼ି ଲକୁ, ହାଡ଼ାରି ଲେହେଁ ଆଡ଼ି ଜିକେଏ ମେହଦୁ
 ମାମ୍ମୁ ନୀତାମାନମି, ମାମ୍ମୁ ତଣ୍ଡ ବେଟାଆହାମାନମି ସାମା ହାହା
 ହିଲଅମି, ୧୦ ମାମ୍ମୁ ଦୁକୁ ତଳେ ମାଟିହଁ ଜିକେଏ ବାରେବେଲା ରାହଁ
 ତଳେ ମାନମି, ମାମ୍ମୁ କାକୁଲି ଗାଟାତମି ଲେହେଁ, ସାମା ହାରେକା
 ଲକୁତାକି ବାଡ଼କା ମାନମି, ମାଙ୍ଗେ ଏନ୍ଦାୟି ହିଲାଆଲେହେଁ ସାମା
 ମାମ୍ମୁ ସ୍ତାତାତଳେ ବାରେତି ଅଦିକାରା ଗାଟାତମି; ଇ ବାରେତାଣା ମାମ୍ମୁ

☆ ୭:୫ ୭:୫ କାମା ୧୭:୨୩

ମାହାପୁରୁତି ସେବା କିନାତମି ଲେହେଁ ଜାହାରାଇଁ ଜଗେ ଗାଟାତମି
ଇଞ୍ଜି ତସାକତି ମାନମି ।

୧୧ କରନ୍ତିତା ମାନି ଜୀଞ୍ଜୁତି ତାୟିୟାଁ ଅଡେ ତାଞ୍ଜିସ୍ତାତେରି, କୁଟୁ
ହିଲାଆଲେହେଁ ମିଙ୍ଗେ ବାରେ ଝେସା ମାଞ୍ଜାନମି । ମୀ ତାଣା ମା ହିୟାଁ
ଦେତାମାନମି । ୧୨ ମିଙ୍ଗେତାକି ମା ଜୀଞ୍ଜୁନନାୟି ଉଣା ଆହା ହିଲେଏ
ସାମା ମା ତାକି ମୀ ଜୀଞ୍ଜୁନନାୟି ଉଣା ଆହାମାନେ । ୧୩ ମିଙ୍ଗେ ନା
ମୀରକା ମାସକା ଇଞ୍ଜି ଅଶ୍ଵାନା ଇ ବାରେ ଝେସିମାଞ୍ଜାଇଁ, ମାମ୍ବୁ
ଜୀଞ୍ଜୁନହଁ ମାଞ୍ଜାନାକି ମୀ ହିୟାଁ ଦେପି ଆପେ ।

ଲାଗେଏ ତାଣାଟି ଜାଗ୍ରାତା କିନାୟି

୧୪ ମୀରୁ ନାମାଆଗାଟାରି ତଲେ ରଲେଏତାତେରି ଆଡ଼ି ଲେହେଁ
କାମା କିଆଦୁ, ଦାମ୍ବୁ କାମାତା ଲାଗେଏତି କାମା ଏନିକି ଆଣ୍ଡିନେ
? ଅଡେ ଆନ୍ଦେରି ତଲେ ଉଜେଡ଼ି ଏନିକି ଆଣ୍ଡିନେ ? ୧୫ କ୍ରୀସ୍ତ
ଇଞ୍ଜା ବିଲିୟାର ଏନିକି ଜାଟୁ ଆନେରି ? ନାମିତାରି ଇଞ୍ଜା
ନାମାଆତାରି ଆମିନି କାତାତା ରଣ୍ଡିଏ ଆନେରି ? ୧୬ *ମାହାପୁରୁତି
ଇଲୁତା, ଏନିକି ପେଶକାତି ପୂଜା ଆନେ ? ସାମା ମାର ନୀତାମାନି
ମାହାପୁରୁତି ଇଲୁତାୟି, ଇତିହଁ ମାହାପୁରୁ ତାନୁଏ ଏଲେଇଞ୍ଜା
ମାନେସି,

“ନା ଲକୁତଲେ ନାନୁ ବାସା କିଇଁ,
ଅଡେ ଏଞ୍ଜାରିତଲେ ମାଇଁ,
ନାନୁ ଏଞ୍ଜାରି ମାହାପୁରୁ ଆଇଁ,
ଅଡେ ଏଞ୍ଜାରି ନା ଲକୁ ଆନେରି ।”

୧୭ ଏଦାଆଁତାକି ପ୍ରବୁ ଏଲେଇଞ୍ଜା ମାନେସି,

“ମୀରୁ ଏଞ୍ଜାରି ତାଣାଟି ହଟା ଖାଦୁ,
ଏଞ୍ଜାରି ତାଣାଟି ଏଟକା ଆଦୁ,
ଏନି ଲାଗେଏତି ଦିଶ୍ଵୁ ତୀଗାଆଦୁ,
ଆତିହଁ ନାନୁ ମିଙ୍ଗେ ଆବାଇଁ,

୧୮ ନାନୁ ମୀ ଆବା ଆଇଁ,
ଅଡେ ମୀରୁ ନା ମୀରକା ମାସକାତେରି ଆଡେରି,

ବାରେକିହଁ ବାଡ଼୍ଠୁଗାଟି ପ୍ରବୁ ଇଦାଆଁ ୱେସିମାଞ୍ଜାନେସି ।”



^୧ ଇଚିହଁ, ଏ ତାୟିୟାଁ ଅଡ଼େ ତାଙ୍ଗିସ୍ତାତେରି, ଇ ବାରେ ଆଞ୍ଜାମାଗାଣି ନେଡ଼ା ଆହାମାନାକି ୱାଦୁ, ମାର ମା ଆଙ୍ଗା ଅଡ଼େ ଜୀଝୁତି ଲାଗେଏ ତାଣାଟି ଆବହା କଡିନ, ଇଞ୍ଜା ମାହାପୁରୁଇଁ ଆଜାନା ସୁଦୁ ମାଣକିତା ନେହଁ ଆନ ।

ପାଝୁଲତି ରାହଁ

^୨ ମୀ ହିୟାତା ମାଙ୍ଗେ ଟାୟୁ ହିୟାଦୁ, ମାମ୍ ଆମ୍ବାଆରାଇଁ ଲାଗେଏ କିହାହିଲଅମି, ଆମ୍ବାଆରାଇଁ ନାସା କିହାହିଲଅମି କି ଆମ୍ବାଆରାଇଁ ବୁଡ଼ଝି କିହାହିଲଅମି । ^୩ ନାନୁ ମିଙ୍ଗେ ଦହ ଦସାଲି ଇଦାଆଁ ୱେସିମାଞ୍ଜାଅଁ; ଇଚିହଁ ନାନୁ ତଲିଏ ୱେସାମାଞ୍ଜାଇଁ, ମୀରୁ ମା ହିୟାତା ଏଚେକା ଟାୟୁ ବେଟାଆହାମାନାକି ମାର ହାଡ଼ିହଁ ରଣ୍ଡିଏ ତାଣା ହାନ, ନୀଡ଼ିତିହଁ ରଣ୍ଡିଏ ତାଣା ନୀଡିନ । ^୪ ମୀ ତାଣା ନାଙ୍ଗେ ହାରେକା ନାମ୍ ମାନେ, ମିଙ୍ଗେତାକି ନାଙ୍ଗେ ହାରେକା ବଡପଣ ହଡ଼ି ମାଞ୍ଜାନେ; ନାନୁ ଦୁକୁ ତୁକହା ମାଇଁ, ମା ବାରେ କସ୍ତା ନାନୁ ସାସା ଆହାମାଇଁ, ଅଡ଼େ ନା ହିୟାତା ରାହଁ ହଡ଼ିମାଞ୍ଜାନେ ।

^୫ *ମାକିଦନିୟାତା ଏଜାଲିଏ ଜିକେଏ ପାଙ୍ଗାତା ଗଡ଼ହା ବିତ୍ରା ଆଜି, ଇଲେତି କସ୍ତ ବେଟାଆହାଲିଏ ମା ଆଙ୍ଗା ଜିକେଏ ଜମାଲି ପ୍ଲାଞ୍ଜାଆତେ । ^୬ ସାମା ହେଲା ଗାଟାରାଇଁ ସାସା ହାନି ତିତସଇଁ ମାହାପୁରୁ ପାଣ୍ଡାନା ମାଙ୍ଗେ ସାସା ହିୟାତେସି । ^୭ ୱାରୁଇ ତାନି ୱାଡ଼ାକି ରାହଁ ଆଏ, ସାମା ଏଞ୍ଜାସି ମୀ ତାଣା ହାଜାନା ଏମିନି ସାସା ବେଟାଆହାମାନେସି । ଏମ୍ବାଟି ମାଙ୍ଗେ ସାସା ହିୟାତେସି, ଏଚେକା ନାଙ୍ଗେ ମେସାଲି ମୀରୁ ଅଣ୍ଡିମାଞ୍ଜେରି, ଏଚେକା ମୀରୁ ଦୁକୁ କିହିମାଞ୍ଜେରି, ମୀରୁ ନା ତାଣା ବାର୍ସୁ ଇଟାଲି ଏଚେକା ତିୟାରା ଆହାମାଞ୍ଜେରି, ଏଦାଆଁତାକି ନାନୁ ନୀଏଁ ହାରେକା ରାହଁ ଆହିମାଇଁ ।

^୮ ନାନୁ ନା ତଲିତି ଆକୁତା ମିଙ୍ଗେ ଦୁକୁ ହାହାମାଞ୍ଜାତିହଁ ଜିକେଏ ଏଦାଆଁତାକି ଦୁକୁ ଆଏ; ଏ ଆକୁ ଗାଡ଼େକା ତାକି ମିଙ୍ଗେ ଦୁକୁ ହାହା ମାଞ୍ଜାନାଣି ମେସାନା ନାନୁ ଦୁକୁ ଆଡ଼ିଜିକେଏ ^୯ ନୀଏଁ ରାହଁ ଆହିମାଇଁ,

☆ ୭:୫ ୭:୫ ୨କର ୭:୧୩

ମୀରୁ ନୀର୍ବ ଦୁକୁ ଆତେରି ଏଦାଆଁତାକି ଆଏ, ସାମା ମୀ ଦୁକୁ ମିଙ୍ଗେ ମନ ଖେଟ୍ପି କିତାକି ରାହାଁ ଆହାମାଲ୍; ଇଚିହ୍ ମା ତାଣାଟି ମୀଦି ଏନାୟିଝା ବୁଡ଼ି ଆଆପେ, ଏଦାଆଁତାକି ମୀରୁ ମାହାପୁରୁ ତାଣାଟି ଦୁକୁ ବେଟା ଆହାମାଞ୍ଜେରି । ୧୦ ମାହାପୁରୁ ତାଣାଟି ଖାନ୍ତି ଦୁକୁ ଗେଲ୍ପାଲିତାକି ମନ ଖେଟ୍ପି କିଞ୍ଜିକିନେ, ଏଦାଆଁତାକି ଅଣ୍ପିନାୟି ଲଡ଼ା ହିଲେଏ; ସାମା ଇ ଦାରତିତି ଦୁକୁ ହାଞ୍ଜିକିନେ । ୧୧ ମେହଦୁ ମାହାପୁରୁତି ମନତଲେ ଆମିନି ଦୁକୁ ବେଟାଆତେରି, ଏଦି ମୀ ତାଣା ଏଚେକା ରାହାଁଗାଟାୟି, ହାଅ, ମୀ ଦହ ହିଲାଆଗାଟାଣି ତସାମାନେ, ହାଅ ଏଚେକା ଅଣ୍ପୁ, ଏଚେକା ଆଜି, ଏଚେକା ମନ, ଏଚେକା ସେବା, ଲାଗେଏତାଣି ତଣ୍ଡ ହାହାଲି ଏଚେକା ଅଣ୍ପୁ, ଏ ବାରେ ତାଣାଟି ମୀରୁ ଅଟହାତେରି ଇଞ୍ଜି ତଞ୍ଜା ଆହିମାଞ୍ଜେରି ।

୧୨ ଇଦାଆଁତାକି ନାନୁ ମୀ ତାଣା ଏ ଆକୁ ରାଚିତେଏ, ଆତିହ୍ ଜିକେଏ ଆମ୍ବାଆସି ଲାଗେଏ କିହାମାନେସି, କି ଆମ୍ବାଆସି ଲାଗେଏତାଣି ଅରହା ମାନେସି, ଏଞ୍ଜାଣାକି ରାଚିତେଏ, ଏଦି ଆଏ, ସାମା ମାଙ୍ଗେ ତାକି ମୀ ରାହାଁ ଏନିକ୍ ମାହାପୁରୁ ନକିତା ମୀ ତାଣା ସାତେଏ ଇଞ୍ଜି ତଞ୍ଜାଆନେ, ଏଦାଆଁତାକି ରାଚିତେଏ । ଇଚିହ୍, ମାମ୍ବୁ ସାସା ବେଟାଆହାମାନମି । ୧୩ ଅଡ଼େ ମା ବାସୁତା ମାମ୍ବୁ ତିତସ ରାହାଁତାକି ହାରେକା ରାହାଁ ଆଡ଼ମି, ଇଚିହ୍ ଏଞ୍ଜାଣି ଜୀଝୁ ମୀ ବାରେ ଜାଣା ତାଣାଟି ରାହାଁ କିହାମାଞ୍ଜେରି । ୧୪ ଆତିହ୍ ଏନି କାତା ତିତସ ତାଣା ମୀ ତାକି ନାନୁ ବଡ଼ପଣ କିହାମାଲ୍, ଆତ୍ ଲାଜା ଆହାହିଲଅଁ, ସାମା ଏନିକ୍ ମାର ବାରେ କାତାତା ମିଙ୍ଗେ ସାତା ଖେସାମାଞ୍ଜାତମି, ଏଲେକିହ୍ ତିତସ ନକିତା ମା ବଡ଼ପଣ ଆନାୟି ଜିକେଏ ସାତା ଇଞ୍ଜି ପୁଣ୍ଡିଆହାମାନେ । ୧୫ ଇଞ୍ଜା ମୀରୁ ଏନିକ୍ ଆଜି ଅଡ଼େ ତୀରୁହି ଏଞ୍ଜାଣାଲ୍ ଆବାହାଁ ଏଞ୍ଜାଣି ତାଣା ବାରେଜାଣା ତେରି ମାନୁଞ୍ଜି ଆଡ଼େରି, ଏ ବାରେ ଅଣ୍ପାନା ମିଙ୍ଗେତାକି ତାନି ହିୟାତା ଜୀଝୁନନାୟି ହାରେକା ପାତା ଆଡେ । ୧୬ ନାନୁ ବାରେ ତାଣାଟି ମିଙ୍ଗେ ହାରେକା ନାମାଲି ଆଡ଼ାଲ୍ ଏଦାଆଁତାକି ନାଙ୍ଗେ ହାରେକା ରାହାଁ ହଚିମାଞ୍ଜାନେ ।

କ୍ରୀସ୍ତୀନା ଲକ୍ଷ୍ମୀ ଦାନା ହୀନାୟି

୧ ଏ ମା ତାୟିୟା ଅଡ଼େ ତାଙ୍ଗିୟାତେରି, ମାକିଦନିୟା କୁଲମିକାଣା ମାହାପୁରୁ ହୀହାମାନି କାର୍ମାମେହନାଣି ବେଟାଆହାମାନେ, ଏଦାଆଁ ମାମ୍ବୁମିଙ୍ଗେ ୱେସିମାଞ୍ଜାନମି; ୨ ଏଞ୍ଜାରି ବେଟାଆହାମାନି ହାରେକା କସ୍ତତଲେ ତାୟିପାରି କିଞ୍ଜି ଆହାମାନେରି; ଏଞ୍ଜାରି ହାରେକା ହାକି କାକୁଲି ଗାଟାରି ଇଚିହିଁ ଜିକେଏ; ଜାହାରା ଅଶ୍ପୁ ତଲେ ତାମି ଦାନା ହୀନି ତାଣା ଏଞ୍ଜାରି ରାହାଁ ହାରେକା ମାତେ । ୩ ଏଦାଆଁତାକି ଇଚିହିଁ ନାନୁ ସାକି ହୀହିମାଲ୍, ଏଞ୍ଜାରି ଆଡ଼ିନି ପାତେକା, ସାମା ଏଞ୍ଜାରି ଆଡ଼ିନି ବାଡ଼ୟୁ କିହାଁ ଜିକେଏ ହାରେକା ଗାଡ଼ି ଦାନା ହୀହାମାନେରି । ୪ ଜୀହୁଦାତା ମାନି ମାହାପୁରୁ ଲକ୍ଷ୍ମି ସେବା କାମାତା ଆଶୁଞ୍ଜିଆନି କାର୍ମାମେହନାଣି ମେଡ଼ା ଆହାଲିତାକି ଏଞ୍ଜାରି ଜାହାରା ଅଶ୍ପୁ ତଲେ ବାଡ଼ିମାଲିହିଁ ମାଙ୍ଗେ ହେଲ ରୀସ୍ତାତେରି; ୫ ଏଞ୍ଜାରି ୱାରୁଇ ମା ଆସା କିହାମାନିଲେହେଁ କିହାହିଲାଆତେରି, ସାମା ମାହାପୁରୁ ମନତଲେ ସାଲୁଞ୍ଜି ଆହାନା ତଲିଏ ଜାହା ଜାହାରାଲ୍ ପ୍ରବୁ ତାଣା ଇଞ୍ଜାଁ ମା ତାଣା ହେରପାତେରି । ୬ ତିତସ ମୀ ତାଣା ଏ କାର୍ମାମେହନି କାମା ଏନିକିଁ ମାଟୁହା ମାତେସି, ଏଲେକିହିଁ ଏ ଏଦାଆଁ ରାପୁହାଲି ଏଞ୍ଜାଣାଲ୍ ସାସା ହୀତମି । ୭ ମୀରୁ ବାରେ ତାଣାଟି ନକିତା ଆହାମାଞ୍ଜେରି, ଇଚିହିଁ ନାନୁ, କହୁଗାଟାରି, ବୁଦି ଇଞ୍ଜାଁ ବାରେଲେହେଁତି ରାହାଁ, ମିଙ୍ଗେତାକି ମା ଜୀଞ୍ଜୁନନାୟି, ଏଲେକିହିଁ ବାରେ କାତା ଏନିକିଁ ମୀ ତାଣା ହାରେକା ତଞ୍ଜା ଆହିମାନେ, ଏଲେକିହିଁ ଏ ଇ କାର୍ମାମେହନି କାମା ଜିକେଏ ମୀ ତାଣା ହାରେକା ତଞ୍ଜାଆପେ ।

୮ ନାନୁ ହୁକୁମି ହୀନି ଲେହେଁ ୱେସିମାଞ୍ଜାଅଁ, ସାମା ଅର ଲକ୍ଷ୍ମି ରାହାଁ ଆହାଲି ତସାନା ମୀ ଜୀଞ୍ଜୁନନାୟି ସାତା କି ଆଏ ତାୟିପାରି କିହାଲି ୱେସିମାଞ୍ଜାଲ୍ । ୯ ଇଚିହିଁ ମା ପ୍ରବୁ ଜୀସୁ କ୍ରୀସ୍ତି କାର୍ମାମେହନାଣି ମୀରୁ ପୁଞ୍ଜାମାଞ୍ଜେରି, ମୀରୁ ଏନିକିଁ ଏଞ୍ଜାଣି ହିଲାଆଗାଟି ତାଣାଟି ଦନ ଗାଟାତେରି ଆଦେରି, ଏଦାଆଁତାକି ଏଞ୍ଜାସି ଦନଗାଟାସି ଆଡ଼ିଜିକେଏ ମୀ ତାକି ହିଲାଆଗାଟାସି ଆଡ଼େସି ।

୧୦ ଏଦାଆଁତାକି ନା ଅଶ୍ପୁ ଇଦି, ଏ ବାରେ ମିଙ୍ଗେତାକି ନେହେଁ, ଏନିକିହିଁ ତାଣୁଟିଏ ମୀରୁ ମୂଲୁଏ କାମା ମାଟୁହେରି, ଏଦି ଆଏ, ସାମା

ଏ କାମା କିୟାଲି ନକେଏ ଜିକେଏ ଅଣ୍ଠାପାମାତେରି । ୧୧ ନୀଏ ଏ କାମା ଜିକେଏ ରାପୁଦୁ, ମୀରୁ ଏ କାମା କିହାଲି ଏନିକି ଅଣ୍ଠାପାମାତେରି, ଏଲେକିହି ରାହାତି ଅଣ୍ଠାପୁ ତଲେ ଏ କାମା ରାନ୍ନେ । ୧୨ ଇତିହି ହୀହାଲିତାକି ରାହା ମାତିହି ମାଣ୍ଠି ତାନି ଆଡିନିଲେହେ ଏନାଆଁ ହୀନେସି, ମାହାପୁରୁ ନକିତା ନେହାୟି ଆନେ ।

୧୩ ଇତିହି ଏଟକାତାରି ଏନିକି ସୁକୁ ବେଟାଆନେରି, ଇଞ୍ଜା ମୀରୁ କସ୍ତ ବେଟାଆଦୁ, ଏଦାଆଁତାକି ନାନୁ ଇଦାଆଁ ଖେସିମାଞ୍ଜଅ; ୧୪ ସାମା ସମାନା ଆହାଲିତାକି ନୀଏ ମୀ ବାତକୁ ତଲେ ଏଞ୍ଜାରି ଲଡ଼ା ମାନାଣି କିଞ୍ଜି ଆହିମାନେ, ଏନିକିହି ଏଞ୍ଜାରି ବାତକୁ ତଲେ ମୀ ହିଲାଆଗାଟାଣି ପୁରା କିଞ୍ଜିଆନେ, ଇଞ୍ଜା ଇଲେଆହି ସମାନା ତଞ୍ଜାଆନେ, ୧୫ ଦାମ୍ପୁପତିତା ଏନିକିହି ରାସ୍ତକି ଆହାମାନେ, “ଆମ୍ବାଆସି ହାରେକା କୁଡ଼ି କିତେସି, ଏଞ୍ଜାଣିଞ୍ଜାୟି ହାରାଆତେ, ଇଞ୍ଜା ଆମ୍ବାଆସି ଉଣା କୁଡ଼ି କିତେସି, ଏଞ୍ଜାଣାକି ଉଣା ଆଆତେ ।”

ତିତସ ଅଡ଼େ ତାନି ଆର୍ହିତାରି

୧୬ ମାହାପୁରୁକି ଜହରା ଆପେ, ଏଞ୍ଜାସି ମିଙ୍ଗେତାକି ତିତସ ହିୟାତା ରାହାଁ କିହାଲି ସମାନା ଅଣ୍ଠାପିନି ମନ୍ ହୀତେସି । ୧୭ ଇତିହି ଏଞ୍ଜାସି ଖାରଇ ମା ବାତିମାଲିତାଣି ଅପିତେସି, ଏଡ଼ି ଆଏ, ସାମା ଏଞ୍ଜାସି ତାନୁଏ ହାରେକା ରାହାଁ ଆହାଁ ମୀ ତାଣା ଖାହାଲି ଏଞ୍ଜାସି ମନ୍ କିହିମାନେସି । ୧୮ ଏଞ୍ଜାଣିତଲେ ମାମ୍ବୁ ଅର ତାୟିଇ ପାଣ୍ଡିମାଞ୍ଜାନମି; ଏଞ୍ଜାସି ନେହି କାରୁ ଖେକ୍ନି କାମାତାକି ତାନି ଗାଞ୍ଜୁରମି ବାରେ କ୍ରୀସ୍ତାନା କୁଲମିତା ଖେଙ୍ଗାମାନେ, ୧୯ ଖାରଇ ଏଡ଼ି ଆଏ, ସାମା ଏଞ୍ଜାସି ଜିକେଏ ମା ସେବା ତଲେ ଆହିମାନି ଇ କାର୍ମାମେହ୍ନି କାମା ତଲେ ପ୍ରବୁତି ଗାଞ୍ଜୁରମି ଇଞ୍ଜା ରାହାଁ ଅଣ୍ଠାପୁ ତାକି ମା ତଲେ ତାକିନାସି ଆହାଲିତାକି କୁଲମିକା ତଲେ ଆର୍ଞ୍ଜି ଆହାମାନେସି ।

୨୦ ମା ତଲେ କିହିମାନି ଇ ସେବା କାମା ଲେହେଁ ହାରେକା ଦାନାତି କାତାତା ଆମ୍ବାଆସି ଏନିକିହି ମାଙ୍ଗେ ଦହୁ ଦସ୍ତାଆପେସି, ଏଦାଆଁତାକି ଜାଗ୍ରାତା ଆହିମାନମି; ୨୧ ଇତିହି ଖାରଇ ପ୍ରବୁ କାନୁତାକି ଆଏ, ସାମା ଲକୁ କାନୁତାକି ଜିକେଏ ଏନାୟି ନେହାୟି, ଏଦାଆଁ ବାରେ କିହାଲି ଅଣ୍ଠାପିମାନମି ।

୨୨ ଅଡ଼େ, ମାମ୍ବୁମା ଅର ତାୟିଇଁ ଜିକେଏ ଏଞ୍ଜାରିତଲେ ପାଣ୍ଡିମାଞ୍ଜାନମି, ଏଞ୍ଜାଣାଇଁ ମାମ୍ବୁ ହୁରେକା କାତାତା ହାରେକା ଦେବା ତାୟିପାରି କିହାଁ ରାହାଁତଲେ କାମାକିନାସି ଇଞ୍ଜାଁ ନେହଁକଁ ପୁଞ୍ଜାମାନମି, ଇଞ୍ଜାଁ ମୀ ତାଣା ଆଟ୍‌ଝା ନାମ୍ବୁ କିହାଁ ମାନାକି ଏଞ୍ଜାସି ନୀଏଁ ହାରେକା ରାହାଁ ଆହାମାନେସି । ୨୩ ତିତସ କାତା ଆମ୍ବାଆସି ଝେଞ୍ଜାତିହଁ, ଏଞ୍ଜାସି ନା ଆଟ୍‌ହିତାସି ଇଞ୍ଜାଁ ମୀ ତାକି ନା ତଲେ କାମାକିନାସି; ଇଞ୍ଜାଁ ମା ତାୟିୟାଁ କାତା ଝେଞ୍ଜାତିହଁ, ଏଞ୍ଜାରି କୁଲମିକା ତାଣାଟି ପାଣ୍ଡୁଞ୍ଜି ଆହାମାନାରି, ଅଡ଼େ କ୍ରୀସ୍ତତି ଗାଞ୍ଜୁରମି ଝେଞ୍ଜା କିହି ମାନାରି । ୨୪ ଇତିହଁ ମୀ ଜୀଞ୍ଜୁନନାୟି ଇଞ୍ଜାଁ ମୀ କାତାତା ମା ବଡ଼ପଣତି ପାରମାଣା କୁଲମିକା ନକିତା ଏଞ୍ଜାରାକି ତହୁଦୁ ।



ହାକିଗାଟି କ୍ରୀସ୍ତାନା ଲକୁଣି ସାୟେମି

୯ ଜୀହୁଦାତା ମାନି ମାହାପୁରୁ ଲକୁଇଁ ସାୟେମି କିନି କାତା ଅଡ଼େ ମିଙ୍ଗେ ରାଚାଲି ଲଡ଼ା ଆଏ; ୨ ନାନ୍ତୁ ପୁଞ୍ଜାମାଇଁ ମୀରୁ ବାରେବେଲା ସାୟେମି କିହାଲି ତିୟାରା ଆହାମାଞ୍ଜେରି ଇଞ୍ଜାଁ ମାକିଦନିୟାତି ଲକୁ ତାଣା ମୀ ତାକି ନାନ୍ତୁ ବଡ଼ପଣ ଆହିମାଇଁ । ନାନ୍ତୁ ଝେସାମାଚେଏଁ, “ଆକାୟାତି ତାୟିୟାଁ ସାୟେମି କିହାଲି ହାଟି ବାର୍ଯାଟିଏ ତିୟାରା ଆହାମାନେରି ।” ମୀରୁ ଏଲେକଁ ସାୟେମି କିନାୟି ଏଞ୍ଜାରି ବିତ୍ରାଟି ହାରେକା ଲକୁଣି ଜାଗ୍ରାତା କିହାମାନେ । ୩ ଆଡ଼ିଜିକେଏ ନାନ୍ତୁ ତାୟିୟାଁ ପାଣ୍ଡିମାଞ୍ଜାଇଁ, ମୀ ତାକି ବଡ଼ପଣ ତହୁନାୟି ଏନିକଁ ଉଜେଏ ଆଏ, ସାମା ନା କାତାଲେହେଁ ହୀହାଲିତାକି ଜାଗ୍ରାତା ଆଦୁ, ୪ ଏଚେତା ଆପେ ନା ତଲେ ଆମିନି ଲକୁ ପାଟେ ମାକିଦନିୟାଟି ଝାହାଁ ମୀ ଦାନା କୃଡ଼ି କିହା ହିଲାଆ ଗାଟାଣି ମେସ୍ତ୍ରହଁ ମୀରୁ ପାଣ୍ଡି ଲାଜା ପିସାନା ମାମ୍ବୁ ଇ ଆଟ୍‌ଝା ନାମ୍ବୁତି କାତାତାକି ଲାଜା ବେଟାଆନମି ୫ ମୀରୁ ତଲିଏ ଆଞ୍ଜାମାଟି ଦାନା ଏନିକଁ ଗୁରୁମୁରୁ ଆହଁ ହୀନାୟି ଆଆନା ଜାହାରା ଅଣ୍‌ପୁ ତଲେ ଆନେ, ଏଦାଆଁତାକି ତଲିଏ ଏ ଦାନା କୃଡ଼ିକିହାଲି ତିୟାରା କିହାଲି ନକେଏ ମୀ ତାଣା ହାଜାଲିତାକି ନାନ୍ତୁ ଏ ତାୟିୟାଁଣି ବାତିମାଲାଲି ଅଣ୍‌ପାମାଚେଏଁ ।

୭ ସାମା ଇ କାତା ସାତା, ଆମ୍ବାଆସି ରଚାଣି ବିଚା ମାଟିନେସି, ଏଞ୍ଜାସି ଇଚାଣି ତାସା ବେଟା ଆନେସି; ଅଡ଼େ ଆମ୍ବାଆସି ଗାତି ବିଚା ମାଟିନେସି, ଏଞ୍ଜାସି ଗାତି ତାସା ବେଟାଆନେସି । ୭ ବାରେଜାଣା ଜାହାରା ହିୟା ଏନିକ୍ ଅଣ୍ଡାପା ମାନେ, ଏଲେକ୍ କିପେରି, ମୁସ୍ କି ବାଲାମାତମି ତଲେ ଆଏ; ଏନାଆଁତାକି ଇଚିହ୍ ମାହାପୁରୁ ଜାହାରା ଅଣ୍ଡାପୁ ତଲେ ଦାନାହାନି ଲକୁଣି ଜୀଝୁ ନନେସି । ୮ ଅଡ଼େ, ବାରେ ଦିଶ୍ସୁ ବାରେବେଲା ହାରେପୁରେ ବେଟାଆହାଁ ମୀରୁ ଏନିକ୍ ବାରେ ନେହ୍ କାମାତାକି ହାରେକା ଇଞ୍ଜା ହାରେକା ଦାନା କିହାଲି ଆଡ଼ିଦେରି, ଏନାଆଁତାକି ମାହାପୁରୁ ମିଙ୍ଗେ ବାରେଲେହେଡ଼ି କାର୍ମା ହାରେପୁରେ ହୀହାଲି ଆଡ଼ାନେସି । ୯ ଦାମ୍ପୁପତିତା ରାସ୍ତକି ଆହାମାନେ,

“ଏଞ୍ଜାସି କେୟୁ ଦେଚାନା ଦାନା ହୀହାମାନେସି,

ଏଞ୍ଜାସି ହିଲାଆ ଗାଟାରାକି ହାରେପୁରେ ହୀହାମାନେସି; ଏଞ୍ଜାଣି ଦାମ୍ପୁ ଏଚେଲାଞ୍ଜା ରାଏ ।”

୧୦ ମାହାପୁରୁ ମାଟିନାଣାକି ବିଚା ଅଡ଼େ ତିଞ୍ଜାଲି ରାନ୍ଦା ହୀନେସି, ଏଞ୍ଜାସି ମାଟାଲିତାକି ମିଙ୍ଗେ ବିଚା ହିୟାନେସି ଇଞ୍ଜା ଏନାଆଁ ପାଡ଼ିକିନେସି, ଅଡ଼େ ମୀ ଦାମ୍ପୁତି ପାଡ଼େୟି ଗାତି କିନେସି । ୧୧ ଏଲେକ୍ ମୀରୁ ବାରେ ଦିଶ୍ସୁତା ବାଡ଼କାନା ଜାହାରା ଅଣ୍ଡାପୁ ତଲେ ଦାନା କିହାଲି ଆଡ଼ିଦେରି, ଇଞ୍ଜା ଏଦି ମା ତାଣାଟି ମାହାପୁରୁଇ ଜହରା କିନାୟି ଆନେ । ୧୨ ଇଚିହ୍ ଇ ଦାନା ହାନି ସେବା କାମା ମାହାପୁରୁ ଲକୁଡ଼ି ଲଡ଼ାମାନାଣି ପୁରା କିହିମାନେ, ଏଦି ଆଏ, ସାମା ଏନାଆଁ ତଲେ ଜିକେଏ ମାହାପୁରୁତି କାମାତା ହାରେକା ଲକୁ ରାହାଁତଲେ ଜହରା କିହିମାନେରି । ୧୩ ଇଚିହ୍ ଇ ସେବା କାମାତି ପାରମାଣା ତାକି ଲକୁ ମିଙ୍ଗେ ଆବିମାଞ୍ଜାନି କ୍ରୀସ୍ତତି ନେହ୍ କାରୁତି ନାମୁ, ଇଞ୍ଜା ମାହାପୁରୁତି ଲକୁ ଅଡ଼େ ବାରେତାକି ମୀ ଆଣ୍ଡିନାୟି ତୀରପୁ ତାକି ମାହାପୁରୁତି ଗାଝୁରମି କିହିମାନେରି । ୧୪ ମିଙ୍ଗେ ମାହାପୁରୁତି ହାରେପୁରେ କାର୍ମାମେହ୍ନାଣି ତାକି ଏଞ୍ଜାରି ଜିକେଏ ହାରେକା ରାହାଁତଲେ ପ୍ରାତାନାତା ମିଙ୍ଗେ ଅଣ୍ଡାପାଞ୍ଜାନେରି । ୧୫ ମାହାପୁରୁତି ହାରେପୁରେ ଦାନା ତାକି ତାଙ୍ଗେ ଜହରା ଆପେ ।

୧୦

ପାଞ୍ଚଲ ତାନି ସେବା କାମାତାକି ଖେଣ୍ଡେଖେନ୍ଦନାୟି

୧ ନାନୁ ପାଞ୍ଚଲତେଏଁ ମୀ ନକିତା ସାପି ଆହା ମାନାତେଏଁ ସାମା ହେକ ମାନାଟି ବାଡ଼ୁୟୁ ତହ୍ନାତେଏଁ, ନାନୁଏ କ୍ରୀସ୍ତତି ସୁଦୁଗାଟି ଅଣ୍ପୁ ତଲେ ମିଙ୍ଗେ ବାଡ଼ିମାଲିହିଁ ରୀସିମାଞ୍ଜାଇଁ, ୨ ହାଅ ନାନୁ ପ୍ରାତାନା କିହିମାଲିଁ, ମାର ମାଣ୍ଡିତି ଅଣ୍ପୁ ତଲେ ତାକିମାନାୟି ଇଞ୍ଜିଁ ଅଣ୍ପିମାନାରି କପାଟି ବାଡ଼ୁୟୁ ତସାଲି ଅଣ୍ପାମାଲିଁ, ଇଞ୍ଜା ନାନୁ ଖାଡ଼ିସାରେ ଏଲେତି ବାଡ଼ୁୟୁ ତସାଲି ଆଏ; ୩ ମାର ଇ ଦାରତିତା ଆଙ୍ଗା ତଲେ ନୀତାମାନାୟି ସାତା, ସାମା ମାର ଦାରତିତି ଅଣ୍ପୁ ତଲେ ଜୁଜୁ କିହି ହିଲାଆୟି, ୪ ଇତିହିଁ ମା ଜୁଜୁତି ସାକୁ ଆଙ୍ଗାତି ଜୁତି ତଲେ ଆଏ, ସାମା କାଜା କଟା ଇଲୁ ମେକ୍‌ହାଲି ମାହାପୁରୁ ନକିତା ଏ ବାରେ ବାଡ଼ୁୟୁ ଆରେ; ୫ ମାମ୍ ନୁତି ଅଣ୍ପୁ କାତା ବାରେ ଅଡ଼େ ମାହାପୁରୁତି ବୁଦି କପାଟି ନିଙ୍ଗିନି ବତପଣ ତହ୍ନି କାଜା କାତାତି ବାରେ ମେକ୍‌ନମି; ଅଡ଼େ ବାରେଲେହେତି ଅଣ୍ପିନାଣି ଆସାନା କ୍ରୀସ୍ତତି ମାନି ଆୟାଲି ଦସ୍ପି କିହିମାନମି । ୬ ଏତିବେଲା ମୀରୁ ବାରେ ଖାକିଟି ମାନୁଞ୍ଜି ଆଡ଼େରି, ଏତିବେଲା ମାମ୍ ମାନୁଞ୍ଜି ଆଆଗାଟାଣି ବାରେ ଡ଼ଣ୍ଡ ହାନମି ।

୭ ମୀରୁ ସାରିସୁରୁ ପାଙ୍ଗାତା ତଞ୍ଜା ଆହିମାନାଣି ମେସିମାଞ୍ଜେରି । ଆମ୍ବାଆସି ଜାହାରାଇଁ କ୍ରୀସ୍ତତି ଲକୁତେଏଁ ଇଞ୍ଜିଁ ନାମିନେସି, ଆତିହିଁ ଏଞ୍ଜାସି ଏନିକିଁ କ୍ରୀସ୍ତତି ଲକୁ, ମାମ୍ ଜିକେଏ ଏଲେକିଁ କ୍ରୀସ୍ତତି ଲକୁ, ଇଦାଆଁ ତାନୁଏ ଅଣ୍ପାପେସି । ୮ ଇତିହିଁ ମା ଅଦିକାରା ତାକି ନାନୁ ଅଲ୍ପ ଗାତି ବତପଣ ତସି ଜିକେଏ ଲାଜା ଆଅଁ; ମିଙ୍ଗେ ନାସଞ୍ଜି କିହାଲି ପ୍ରୁ ମାଙ୍ଗେ ଅଦିକାରା ହୀଆନା ମିଙ୍ଗେ ତିୟାରା କିହାଲି ହୀହାମାଞ୍ଜାନେସି । ୯ ନା ରାଡ଼ିତି ଆକୁୟାଁ ତଲେ ନାନୁ ମିଙ୍ଗେ ଆଜିକିହି ମାଞ୍ଜାନେସି ଇଞ୍ଜିଁ ଅଣ୍ପାଆଦୁ । ୧୦ “ଏତରଜାଣା ଏଲେଇନେରି, ପାଞ୍ଚଲ ତାନି ଆକୁ ରାଡ଼ିନାଟି ଅଦିକାରା ଅଡ଼େ କାଜା ବାଡ଼ୁୟୁ ଗାଟାଇ, ସାମା ମା ତଲେ ଆଙ୍ଗାତା ମାନାଟି ଏଞ୍ଜାସି ବାଡ଼ୁୟୁ ହିଲାଆଗାଟାସି ଅଡ଼େ ତାନି କାତା ବାରେ ଉଜେଏତାୟି ।” ୧୧ ମାମ୍ ହେକ ମାଞ୍ଜାନା ଆକୁତା ରାଡ଼ିନି କାତା ଏନିଲେହେତାୟି, ମୀ ତଲେ

ମାଞ୍ଜାନା କିନି କାମା ଜିକେଏ ଏଲେତାୟିଏ ଇଞ୍ଜି ଲକୁ ଅଶ୍ଵାପେରି ।

୧୭ ଇଚିହ୍ ଆମ୍ବାଆରି ଜାହାରାଇଁ ବତପଣ ତସା କଡ଼ିନେରି, ଏଞ୍ଜାରି ତଲେ ମାଞ୍ଜେ ଲେକା କିହାଲି ଜିକେଏ ମା ସାସା ହିଲେଏ; ସାମା ଏଞ୍ଜାରି ତାମ୍ବୁତାମି ତାଣାଟି ଜାହାରାଇଁ ଲେକା କିହାନା ବୁଦି ହିଲିଆଗାଟାରି ତଞ୍ଜା ଆନେରି । ୧୮ ସାମା ମାମ୍ବୁହାନ୍ଦି ଗାଣ୍ଡା ହାଜାନା ବତପଣ ତହୁଅମି; ମୀରୁ ଜିକେଏ ମାହାପୁରୁ ମାଞ୍ଜେ ହେରପା ମାଞ୍ଜାନି କାମାତି ହାନ୍ଦି ବିତ୍ରା ତାତେରି, ଏ ଲେକା ତଲେ ବତପଣ କିଦେରି । ୧୯ ଇଚିହ୍ ମୀରୁ ମା ହାନ୍ଦି ବିତ୍ରା ହିଲିଆତି ଲେହେଁ ମାମ୍ବୁ ହାନ୍ଦି ଗାଣ୍ଡା ମାନମି, ଏଦି ଆଏ; ଏନିଇଚିହ୍ କ୍ରୀସ୍ତତି ନେହ୍ କାରୁ ଝେକ୍‌ହିହ୍ ମାମ୍ବୁମୀ ତାଣା ଜିକେଏ ତଲିଏ ଝାହାମାତମି; ୧୯ ମାହାପୁରୁ କିହାମାନି ମା କାମାତି ପାଙ୍ଗାତା ଏଟକା ଲକୁତି କାମାତା ବତପଣ କିହିଲିଅମି, ସାମା ମାମ୍ବୁଆସା କିହିମାନମି ମୀରୁ ନାମୁତା ପାତା ଆନାଣିତଲେ ମୀ ତାଣାଟି ମା କାମା ଅଡେ ହାରେକା ପାତା ଆନେ । ୨୦ ମାମ୍ବୁଅର ରଅଣି ହାନ୍ଦି ବିତ୍ରା ଏଞ୍ଜାସି ତଲିଏ କିହାମାନି କାମାତାକି ବତପଣ ତହୁଆନା, ମାମ୍ବୁମୀ ତାଣାଟି ଅର ଦେସାତା ହାଜାନା ନେହ୍ କାରୁ ଝେକ୍‌ହାଲି ଆଡ଼ିନମି ଇଞ୍ଜି ଆସା କିହିମାନମି ।

୨୦ ସାମା ଦାମ୍ବୁପତିତା ରାସ୍‌କି ଆହାମାନେ, “ବତପଣ ତହୁନାସି ପ୍ରୁ କିତି କାମାତାକି ବତପଣ ତସ୍‌ପେସି ।” ୨୧ ଜାହାରାଇଁ ନେହ୍‌ତେଏଁ ଇଞ୍ଜି ଅଶ୍ଵିନାସି ଏଞ୍ଜାସି ତାୟିପାରିତା ଜୀଣା ଆଡାସି ଆଏ, ସାମା ପ୍ରୁ ଆମ୍ବାଆରାଇଁ ସାତା ନେହ୍‌ସି ଇଞ୍ଜି ଇନେସି ଏଞ୍ଜାସି ତାୟିପାରିତା ଜୀଣା ଆଡାସି ।

୧୧

ପାଞ୍ଜୁଲ ଅଡେ ମିଚି ଜାମ୍ବୁନାରି

୧ ନାନୁ ବୁଦି ହିଲିଆ ଗାଟାତେଏଁ ଲେହେଁ ଇଚେକା ଝେସାଲି ନାଞ୍ଜେ ହେଲ ହିୟାତିହ୍ ନେହେଁ ଇଞ୍ଜି ଅଶ୍ଵିପାଲି, ମୀରୁ ନାଞ୍ଜେ ହେଲ ହିୟାଦେରି । ୨ ମାହାପୁରୁ ତାକି ହାରେକା ରାହ୍‌ତା ନାନୁ ମିଞ୍ଜେତାକି ହାରେକା ରାହ୍‌ତା, ଇଚିହ୍ ନାନୁ ମିଞ୍ଜେ ସୁଦୁ ଡାଆ

ମାଙ୍ଗାଲେହେଁ ର ଡକ୍ତା ତାଣା ଇଚିହଁ କ୍ରୀସ୍ତୁଇଁ ବୀହା ଆୟାଲି କାତା ହୀହାମାଇଁ । ୩ ସାମା ରାରୁ ତାନି ସୁତ୍ରମି ତଲେ ହବାଇଁ ନାଡ଼ି କିତେ, ଏଲେକିହଁ ଏଚେତା ଆଠେ ମୀ ମନ କ୍ରୀସ୍ତୁ ତାଣା ମାନି ତୀରପୁତାୟି ଇଞ୍ଜା ସୁଦୁତା ମାନାୟି ନାସା ଆନେ, ଇଦାଆଁ ନାଙ୍ଗେ ଆଜି ହଡ଼ିମାଞ୍ଜାନେ । ୪ ଇଚିହଁ ଆମିନି ଜୀସୁଇଁ ମାମ୍ନୁ ଝେକ୍‌ଆତମି, ଇଲେକିହଁ ଏଚକା ଜୀସୁଇଁ ଆମ୍ବାଆସି ଆଠେ ଖାହାଁ ଝେକ୍‌ନେସି, କି ଆମିନି ସୁଦୁଜୀଝୁ ମୀରୁ ବେଟାଆଆତେରି, ଇଲେକ୍‌ ଏଚକାତି ର ସୁଦୁଜୀଝୁ ବେଟାଆଦେରି, କି ଆମିନି ନେହଁ ବଲୁ ମୀରୁ ଆବାଆତେରି, ଇଲେକ୍‌ ଏଚକାତି ର ନେହଁ ବଲୁ ବେଟାଆଦେରି, ଏଲେଆଡ଼ିହଁ ମୀରୁ ଗାଡ଼ି ଅର୍‌ହିନାତେରି ।

୫ ଇଚିହଁ ଏ କାଜାପାଣା ଗାଟି “ପାଣ୍ଡୁଝି ଆଡ଼ାରି” ତାଣାଟି ନାନୁ ଏନିକିହଁ ଜିକେଏ ଉଣା ତାତେଏଁ ଆଏ ଇଞ୍ଜାଁ ଅଣପିମାଇଁ । ୬ ସାମା ନାନୁ କାତା ଜଲାଇଁ ପୁନାଆଡ଼ି ଜିକେଏ ରୁଦିତା ଉଣାତେଏଁ ଆଏ; ସାତାତଲେ ମାମ୍ନୁ ତୁରେଲେହେଁତି ବାରେ କାତାତା ମିଙ୍ଗେତାକି ଇଦାଆଁ ଝେସ୍ତାତମି ।

୭ ମୀରୁ ଏନିକ୍‌ କାଜାତେରି ଆଦେରି, ଏଦାଆଁତାକି ନାନୁ ଜାହାରାଇଁ ଉଣା କିହାକତାନା ମୀ ତାଣା ଉଜେଏନେଏ ମାହାପୁରୁତି ନେହଁ କାରୁ ଝେକ୍‌ହାତେଏଁ; ଏଲେକିୟାଲିଏ ନାନୁ ଏନି ପାପୁ କିତେଏଁ । ୮ ମୀ ତାଣା କାମା କିହଁ ମିଙ୍ଗେ ସେବା କିୟାଲି ଏଚକା କୁଲମିଟି ବର୍ତନ ବେଟାଆହାଁ ଏଞ୍ଜାରି ତାଣାଟି ମୀଞ୍ଜା ଅହିମାଚେଏଁ । ୯ ମୀ ତାଣା ମାଟିବେଲ୍ଲା ନାଙ୍ଗେ ଏନାଆଁ ହିଲ୍ଲାଆଡ଼ି ଜିକେଏ ଆମ୍ବାଆରାକି ବାଦା ହୀହାହିଲଅଁ; ମାକିଦନିୟାଟି ଖାଡ଼ି ତାୟିୟା ନାଙ୍ଗେ ଲଡ଼ା ଆନାଣି ବାରେ ହିୟାତେରି, ମିଙ୍ଗେ ବଜୁ ହୀଆରେଚୁ ନାନୁ ଜାଗ୍ରାତା ଆହାମାଚେଏଁ, ଅଡ଼େ ଜାଗ୍ରାତା ଆହାଁ ଡ଼ୟିଇଁ । ୧୦ ନା ତାଣା ମାନି କ୍ରୀସ୍ତୁତି ସାତାଇଁ ସାକି ଇଗାନା ଝେସିମାଇଁ, ଆକାୟା ଗାଡ଼ାୟାତି ନା ଇ ବତପଣତି ଆମ୍ବାଆସି ଜିକେଏ ସାପି କିହାଲି ଆଡ଼ଅରି ଏନାଆଁକି ? ୧୧ ନାନୁ ମିଙ୍ଗେ ଜୀଝୁନହଁ ମାଞ୍ଜାଆକି କି ? ମାହାପୁରୁ ପୁଞ୍ଜାମାନେସି ନାନୁ ମିଙ୍ଗେ ଜୀଝୁ ନହଁ ମାଞ୍ଜାଇଁ !

୧୨ ସାମା ବତପଣ ଆନିତାଣା ମା ଲେହେଁ ତଞ୍ଜାଆହାଲି ଆମିନି

“ଉଜେଏତି ପାଣ୍ଡୁଆଡ଼ାରି” ପାରୁ ପାରିମାନେରି ନାନୁ ଏନିକ୍ ଏଞ୍ଜାରକି ପାରୁ ହାଅଁ, ଇଦାଆଁତାକି ନାନୁ ଏନାଆଁ କିହିମାକ୍, ଏଦାଆଁ କିହିମାକ୍ । ୧୩ ଇଚିହିଁ ଏଲେତି ଲକ୍ଷୁ ନାଡ଼ିକିନି ପାଣ୍ଡୁ ଆଡ଼ାରି, ଇଞ୍ଜା ଖାଣା ବାଦ୍‌ଲଞ୍ଜିକିହାଁ କାମାକିନାରି, ଏଞ୍ଜାରି କ୍ରୀସ୍ତତି ପାଣ୍ଡୁ ଆଡ଼ାରି ଖାଣା ଆହ୍‌ନେରି । ୧୪ ଇଚିହିଁ ଏଦି କାବାଆନି କାତା ଆଏ, ଇଚିହିଁ ସୟତାନ ତାନୁଏ ଉଜେଡ଼ିତି ଦୂତୁତି ଖାଣା ଆହ୍‌ନେ ! ୧୫ ଏଚେଟିଏ ତାନି ହଲିୟାକ୍ମା ଜିକେଏ ଦାମ୍‌ଗାଟାରି ଖାଣା ଆହ୍‌ନେରି, ଆତିହିଁ ଏଦି କାଜା କାତା ଆଏ; ରାନି ଦିନାତା ଏଞ୍ଜାରି ତାନି କିତି କାମା ତଲେ ତଣ୍ଡୁ ବେଟାଆନେରି ।

ପାଣ୍ଡୁଆଡ଼ି ପାଣା ତାକି ପାଞ୍ଜୁଲ କସ୍ତୁ ବେଟାଆନାୟି

୧୬ ନାନୁ ଅଡ଼େ ଝେସିମାଞ୍ଜାକ୍, ଆମ୍ବାଆସି ନାଜେ ବୁଦି ହିଲାଆଗାଟାସି ଇଞ୍ଜିଁ ଅଣ୍‌ପାଆପେସି; ସାମା ମୀରୁ ଏଲେକ୍ ଅଣ୍‌ପିଦେରି, ଆଡ଼ିଜିକେଏ ବୁଦିହିଲାଆଗାଟାସି ଲେହେଁ ନାଜେ ଆବାଦୁ, ଏନିଇଚିହିଁ ନାନୁ ଜିକେଏ ଅଲ୍‌ପ ବଡ଼ପଣ ତସାଲି ଆଡ଼ିକ୍ । ୧୭ ନୀଏଁ ନାନୁ ଏନାଆଁ ଝେସିମାକ୍ ପ୍ରବୁତି ଅଣ୍‌ପୁ ତଲେ ଝେସିମାଞ୍ଜାଅଁ, ସାମା ବୁଦି ହିଲାଆ ଗାଟାଟେଏଁ ଲେହେଁ ହାରେକା ସାସାତଲେ ବଡ଼ପଣ ତସାନା ଝେସିମାଞ୍ଜାକ୍ । ୧୮ ହାରେକା ଲକ୍ଷୁ ଦାରୁଡ଼ିତି ଲେହେଁ ବଡ଼ପଣ ଆହିମାନାକି ନାନୁ ଜିକେଏ ବଡ଼ପଣ ତହ୍‌କ୍ । ୧୯ ଇଚିହିଁ ମୀରୁ ହାରେକା ବୁଦି ଗାଟାଟେରି ଇଞ୍ଜିହିଁ, ରାହାଁ ତଲେ ବୁଦି ହିଲାଆଗାଟାକାକ୍ ଅରୁହି ମାଞ୍ଜେରି । ୨୦ ଆମ୍ବାଆସି ମିଜେ ହଲିୟାକ୍ମା କିହାନା ଇଟାନେସି, ମୀ ଦନ ମୀଞ୍ଜା ଅୟାନେସି; ମିଜେ ପାନ୍ଦାତା ମେଡ଼ହାଁ ଆସ୍ତାନେସି, ତାହାରା ଆୟାନେସି କି ମୀ ଗେଏଲାତା ସାପ୍‌ଡ଼ା ଝେଟାନେସି ଏ ବାରେ ଅରୁହି ମାଞ୍ଜେରି । ୨୧ ନାନୁ ଲାଜାତଲେ ଝେସିମାଞ୍ଜାକ୍, ମୀର ବାଡ଼ୁୟୁ ହିଲାଆ ଗାଟାତାୟି ଆହ୍‌ମାନାୟି । ଆଡ଼ି ଜିକେଏ ଏନି କାତାତା ଆମ୍ବାଆସି ସାସା ଗାଟାସି, (ନାନୁ ବୁଦି ହିଲାଆନା ଝେସିମାକ୍) ନାନୁ ଜିକେଏ ସାସା ଗାଟାଟେଏଁ । ୨୨ ଏଞ୍ଜାରି କି ଏବୁ ଲକ୍ଷୁ ? ଇଚିହିଁ ନାନୁ ଜିକେଏ ଏବୁ ଲକ୍ଷୁଟେଏଁ । ଏଞ୍ଜାରି ଇସ୍ତାୟେଲ ଲକ୍ଷୁ ? ଇଚିହିଁ ନାନୁ ଜିକେଏ ଇସ୍ତାୟେଲ ଲକ୍ଷୁଟେଏଁ । ଏଞ୍ଜାରି ଅବ୍ରାହାମତି କୂଡ଼ାତାରି ? ଇଚିହିଁ ନାନୁ ଜିକେଏ

ଅବ୍ରାହାମ କୁଡ଼ାତାତେଏଁ । ୨୩ ☆ଏଞ୍ଜାରି କି କ୍ରୀସ୍ତତି ସେବା କିନାରି ? ଇତିହାସ; (ନାନୁ ବାୟା ଆଡିଲେହେଁ ଏଲେଇଞ୍ଜିମାଲ୍), ନାନୁ ଏଞ୍ଜାରି କିହାଁ ଆଗାଡ଼ା ନେହେଁ ସେବା କିନାତେଏଁ, ନାନୁ ଏଞ୍ଜାରି କିହାଁ ଗାଡି ଖାହୁ କାମା କିହାମାଲ୍, ହାରେକା କାୟିଦି ଇଲୁତା ମାଚେଏଁ, ହାରେକା ଇରନି ମାଡ଼ା ବେଟାଆହା ମାଚେଏଁ, ଅଲେ ଅଲେ ହାକିତା ହେରଞ୍ଜା ମାଚେଏଁ । ୨୪ ନାନୁ ଜୀହୁଦି ଲକୁ ତାଣାଟି ପାସା ଦେବା ତୀରିସି ନ ଗଟା ବେତି ବାଡ଼ଗା ମାଡ଼ା ବେଟାଆହାମାଲ୍; ୨୫ ରମ୍ପତି ଲକୁ ତାଣାଟି ତାନି ପାଲି ସାଟ୍‌ଣି ଡରିତଲେ ନାଙ୍ଗେ ଇରହାତେରି, ର ପାଲି ନାଙ୍ଗେ ଖାଲକାତଲେ ଇରହାତେରି, ତାନି ପାଲି ଜାଜା ଡୀତି ତାଣାଟି ଗେଲହା ମାଲ୍, ର ଲାଆଁ ର ମାଦେନା ସାମଦୁରିତି ଏୟୁତା ମୁଞ୍ଜା ମାଚେଏଁ, ୨୬ ☆ନାନୁ ହାରେକା ଦେବା ଜିରୁ ତାକିନାଟି, କାଡ଼ା ଆକ୍ଳିନିତାଣା, ସରକା ତାଣାଟି, ନା କୁଡ଼ାତି ଜୀହୁଦି ଲକୁ ତାଣାଟି, ଏଟକା କୁଡ଼ାତି ଲକୁ ତାଣାଟି, କାଜା ନାସକାତି ଆଜିଟି, ଲକୁ ହିଲାଆ ଜାଡ଼ାଟି, କାଜା ସାମଦୁରି ଆଜିଟି, ଅଡ଼େ ନାଡ଼ିକିନି ତଣେସିକା ଆଜିଟି । ୨୭ ନାନୁ ହାରେକା କାମା କିହାନା କସ୍ତ ବେଟାଆହାମାଲ୍, ଏଚର ପାଲି ଲାଆଁୟାଁ ଇଦା କିଆନା ହାକି ଅଡ଼େ ଏସକିଟି ମାଚେଏଁ, ଏଚର ପାଲି ଉପାସା ତଲେ, ପେନି ଇଞ୍ଜା ନାଟ୍‌ଡ଼ାଟି ମାଚେଏଁ । ୨୮ ଏଲେତି ବାରେ ବାଦା ପିସ୍‌ପେ ନାଙ୍ଗେ ଅଡ଼େ ର କାଜା ବଜୁମାନେ, ଇତିହାସ ବାରେଦିନା କୁଲମିକା ତାକି ନାନୁ ଅଣ୍ପିମାଲ୍ । ୨୯ ଆମ୍ବାଆସି ବାଡ଼ୟୁ ହିଲାଆଗାଟାସି ଆଡ଼ିସାରେ ନାନୁ ଜିକେଏ ବାଡ଼ୟୁ ହିଲାଆ ଗାଟାତେଏଁ ଆଏକି ? ଆମ୍ବାଆସି ପାପୁ କିତିହାଁ ନାନୁ ହିୟାତା ଦୁକୁ ଆଆଁ କି ?

୩୦ ନା ବଡପଣ ତସାଲି ଲଡ଼ା ଆଡିହାଁ, ନାନୁ ନା ଆଡ଼ାଆଗାଟାଣି ତାକି ବଡପଣ ତହୁଲ୍ । ୩୧ ନାନୁ ମିତି ଜଲି ହିଲଆଁ, ଏଦାଆଁ ପୁରୁ ଜୀସୁ କ୍ରୀସ୍ତତି ମାହାପୁରୁ ଅଡ଼େ ଆବା ପୁଞ୍ଜାମାନେସି; ଏଞ୍ଜାସି କାଲାକାଲା ତାକି ଜହରା । ୩୨ ☆ଦମେସକତା ହାରେତା ରାଜାତି ସାଲଞ୍ଜି କିନାସି ନାଙ୍ଗେ ଆସାଲି ଏ ଗାଡ଼ାତି ତାନି କାପୁ କାଠିନି କସକାଣି ପାଣ୍ଡାନା କାପି କିହିମାଚେସି । ୩୩ ଇଞ୍ଜା ର ତାଲିତା କିଡ଼କିତି କାତି ଲାକିଟି ନାଙ୍ଗେ

☆ ୧୧:୨୩ ୧୧:୨୩ କାମା ୧୭:୨୩ ☆ ୧୧:୨୬ ୧୧:୨୬ କାମା ୯:୨୩; କାମା ୧୪:୫
 ☆ ୧୧:୩୨ ୧୧:୩୨ କାମା ୯:୨୩-୨୫

ରେପହାଲିଏ ନାନୁ ଏଞ୍ଜାଣି କେୟୁଟି ଗେଲ୍‌ପିଆଡେଏଁ ।

୧୨

ପାଞ୍ଜୁଲ ତଞ୍ଜାଆନାଣି ମେହ୍‌ନାୟି

୧ ବତପଣ କିନାୟି ନେହାୟି ଆଆତି ଜିକେଏ ନାଙ୍ଗେ ବତପଣ କିନାୟିମାନେ, ନାନୁ ପ୍ରବୁତି ମେହ୍‌ନାଣି ଅଡ଼େ ତଞ୍ଜାଆନାଣି ମିଙ୍ଗେ ୱେସ୍ତାଇଁ । ୨ ନାନୁ ର କ୍ରୀସ୍ତାନା ଲକୁଇଁ ପୁଞ୍ଜାମାଇଁ, ଏଞ୍ଜାସି ସଦ ବାସୀ ନକେଏ ଲାକପୁରୁତି ତାନି ପୁରୁ ପାତେକା ଅଢ଼ିଆଡେସି ଏଞ୍ଜାସି ଆଙ୍ଗା ତଲେ ମାଚେସି କି ଆଙ୍ଗା ହିଲାଆନା ମାଚେସି ନାନୁ ପୁଞ୍ଜାହିଲଅଁ; ମାହାପୁରୁ ପୁଞ୍ଜାମାନେସି । ୩ ହାଅ ନାନୁ ଏଲେତି ର ଲକୁଇଁ ପୁଞ୍ଜାମାଇଁ, ଏଞ୍ଜାସି ପାରାଦିସତା ଅଢ଼ିଆଡେସି ଏଞ୍ଜାସି ଆଙ୍ଗା ତଲେ ମାନେସି କି ଆଙ୍ଗା ହିଲାଆନା ମାଚେସି ନାନୁ ପୁଞ୍ଜାହିଲଅଁ; ମାହାପୁରୁ ପୁଞ୍ଜାମାନେସି । ୪ ଏଞ୍ଜାସି ଲାକପୁରୁ ଅଢ଼ିଆଡେସି, ଅଡ଼େ ଇଲେତି ହାଡ଼ା ୱେଚେସି, ଏଦାଆଁ ମାଣ୍‌ସି ଜଲଲି ଆଡ଼ାଆଗାଟାୟି ଅଡ଼େ ଗୁତିତା ଅହାଲି ଆଡ଼ାଆଗାଟାୟି । ୫ ଇଲେତି ର ଲକୁତାକି ନାନୁ ବତପଣ କିଇଁ, ସାମା ନା ତାକି ନାନୁ ନା ବାଡ଼ୟୁ ହିଲାଆଗାଟାଣି ପିସପେ ଅଡ଼େ ଏନାଆଁତାକିଞ୍ଜା ବତପଣ କିଅଁ । ୬ ବତପଣ ତସାଲି ଅଣ୍‌ପିତିହଁ ଜିକେଏ, ନାନୁ ବୁଦି ହିଲାଆ ଗାଟାଡେଏଁ ଆଅଁ, ଇତିହଁ ନାନୁ ସାତା କାତା ୱେହ୍‌ଇଁ, ସାମା ଲକୁ ନାଙ୍ଗେ ଏନିକଁ ମେସ୍ତାନେରି ଇଞ୍ଜା ନା ତାଣାଟି ଏନିକଁ କାତା ୱେନେରି, ନାଙ୍ଗେ ତଞ୍ଜା ଆହାମାନି କାତାତା ହାରେକା କାଜାୟି ଆହାମାନାକି ଏନିକଁ ନା କାତାତା ହାରେକା ଅଣ୍‌ପଅସି ଇଞ୍ଜା, ଇଦାଆଁତାକି ନାନୁ ସାପି ଆହାମାଇଁ ।

୭ ନାନୁ ଏନିକଁ ଗାଡି ବତପଣ କିଅଁ, ଇଦାଆଁତାକି ନା ଆଙ୍ଗାତା ର ସାସ୍ତି ହାପକି ଆୟାଡେ, ନାଙ୍ଗେ ସାସ୍ତି ହାହାଲି ସୟତାନତି ଦୂଡ଼ୁଇଁ ପାଣ୍ଡୁଆଡେ, ଏନିକଁ ନାନୁ ଗାଡି ବତପଣ ଆଅଁ । ୮ ଏ କସ୍ତ ନା ତାଣାଟି ହେକ ଆୟାଲି ତାନି ପାଲି ପ୍ରବୁଇଁ ବାତିମାଲିହଁ ରାସ୍ତେଏଁ । ୯ ଅଡ଼େ ଏଞ୍ଜାସି ନାଙ୍ଗେ ଏଲେଇଞ୍ଜାନେସି, “ନା କାର୍ମାମେହ୍‌ନାୟି ନିଙ୍ଗେତାକି ହାରେପୁରେ,” ଇତିହଁ ନୀ ବାଡ଼ୟୁ ହିଲାଆତାଣା ନା ବାଡ଼ୟୁ ହାରେ ଗାଡିଆହଁ ତଞ୍ଜାଆନେ, ଇତିହଁ ଏନିକଁ କ୍ରୀସ୍ତତି ବାଡ଼ୟୁ ନା ତାଣା ଡ଼ୟିନେ, ଏଦାଆଁତାକି ନା ବାଡ଼ୟୁ ହିଲାଆ ବେଲାତା

ହାରେକା ରାହାଁ ତଲେ ବତପଣ ତହୁଇଁ । ୧୦ ଏଦାଆଁତାକି କ୍ରୀସ୍ତତି ତାକି ବାଡ଼ୁୟୁ ହିଲାଆଟି, ଲାଜା ପାଣ୍ଡୁନାଟି, ହାକି ବେଲାତା, ସାସ୍ତି ଖାନ୍ତି ବେଲା, କସ୍ତତା ନାନୁ ରାହାଁଆଇଁ, ଇତିହାଁ ଏତିବେଲା ବାଡ଼ୁୟୁ ହିଲାଆ ଗାଟାତେଏଁ ଏତିବେଲା ବାଡ଼ୁୟୁ ଗାଟାତେଏଁ ।

କରିତ୍ତ ତାରକି ପାଖୁଲ ଅଣ୍ଡପିନାୟି

୧୧ ନାନୁ ବୁଦି ହିଲାଆ ଗାଟାତେଏଁ ଲେହେଁ ଆହାମାଇଁ, ମୀରୁ ନାଜେ ଏଲେକିଞ୍ଜି କିୟାତେରି, ମୀରୁ ନାଜେ ନେହାଁସି ଇଞ୍ଜାନାୟି ମାତେ; ନାନୁ ଏନାତେଏଁ ଆଏ, ଆଡ଼ି ଜିକେଏ ଏ “କାଜା ପାଣ୍ଡୁଞ୍ଜି ଆହାମାନାରି” କିହାଁ ଉଣାତେଏଁ ଆଏ । ୧୨ ଆମ୍ବାଆସି ହାରେକା ସିନାୟା, କାବାଆନ୍ତି କାମା, ଅଡ଼େ ବାଡ଼ୁୟୁତି କାମା ପାଣ୍ଡୁଞ୍ଜି ଆହାମାନାରି ସିନାୟାଲେହେଁ, ଏ ବାରେ ସାତେଏ ମୀ ତାଣା ସାସାତଲେ କିଞ୍ଜିଆହାମାନେ । ୧୩ ଇତିହାଁ ନାନୁ ମୀ ବଦୁ ଲେହେଁ ଆହାହିଲଅଁ, ଇ ରଣ୍ଡିଏ କାତା ପିସ୍ପେ ଅର କୁଲମିତି ଲକୁ କିହାଁ ମିଜେ ଅଡ଼େ ଏନିକାଁ ଉଣା ମେସାମାଞ୍ଜାଇଁ, ଏ ନା ଦହ ଆସ୍ତାଆଦୁ ।

୧୪ ମେହଦୁ ମୀ ତାଣା ଖାହାଲି ନାଏଁ ତଲେ ତାନି ପାଲି ତିୟାରା ଆହିମାଇଁ, ଅଡ଼େ ନାନୁ ମିଜେ ଏନି ବଦୁ ହିୟଅଁ, ଇତିହାଁ ନାନୁ ମୀ ଦନ ପାରାଆନା ମିଜେ ପାରିମାଞ୍ଜାଇଁ, ମୀରକା ମାସ୍କା ତାନି ଇୟା ଆବାକି କୃଡ଼ିକିଉ ସାମା ଇୟା ଆବା ଦେଁ ତାନି ମୀରକା ମାସ୍କାକି କୃଡ଼ିକିନାୟି ମାନେ । ୧୫ ନାନୁ ମୀ ଜୀଞ୍ଜୁତାକି ହାରେକା ରାହାଁତଲେ ହାଇଁ, ହାଅ ନା ଜୀଞ୍ଜୁ ଜିକେଏ ହାଇଁ, ନାନୁ ମିଜେ ହାରେକା ଜୀଞ୍ଜୁନହାଁ ମାଞ୍ଜାତିହାଁ ଏନାଆଁ ମୀରୁ ନାଜେ ଉଣା ଜୀଞ୍ଜୁନହାଁ ମାଞ୍ଜାଦେରି ?

୧୬ ସାମା ନାନୁ ଜାହାରାଇଁ ମିଜେ ବଦୁ କିୟାଆତେଏଁ, ସାମା ମୀ ବିତ୍ରାଟି ଆମ୍ବାଆରି ଏଲେଇଞ୍ଜାନେରି ନା ସୁତରି ମାନାକି ମିଜେ ମିତି ତଲେ ଆସ୍ତାତେଏଁ । ୧୭ ନାନୁ ମୀ ତାଣା ଆମ୍ବାଆରାଇଁ ପାଣ୍ଡୁମାଞ୍ଜାଇଁ, ଏଞ୍ଜାରି ବିତ୍ରାଟି ରଅଣି ତଲେ ମୀ ତାଣାଟି ଏନି ଲାବା ବେଟାଆତେଏଁ କି ? ୧୮ ନାନୁ ତିତସଇଁ ହାଜାଲି ବାଡ଼ିମାଲ୍ଲା ମାତେଏଁ, ଇଞ୍ଜା ଏଞ୍ଜାଣିତଲେ ଅର ତାୟଇଁ ମୀ ତାଣା ପାଣ୍ଡୁତେଏଁ । ତିତସ ମୀ ତାଣାଟି ଏନାଆଁ ଲାବା

କିତେସି ? ମାମ୍ବୁ କି ରଣ୍ଡିଏ ଜୀଝୁତଲେ ତାକିହିଲଅମି ? ମାମ୍ବୁ ଯୁନାଆଁ ରଣ୍ଡିଏ ପାଝୁଲିତା ତାକିହିଲଅମି ?

୧୯ ନୀର୍ବ୍ୟ ପାତେକା ମୀରୁ ଅଣପିମାଞ୍ଜେରି, ମାମ୍ବୁ ମୀ ନକିତା ଜାହାରାଈ ନେହଁ କିହିମାନମି ? ମାହାପୁରୁ ନକିତା କ୍ରୀସ୍ତତି ସେବା କିନାତମି ଲେହେଁ ମାମ୍ବୁ କ୍ରୀତା ଜଲିମାନମି, ଇଞ୍ଜା ଏ ଜୀଝୁତି ତାୟିୟାଁ ବାରେ କାତା ମୀ ନେହେଁତାକି ଝେସିମାନମି । ୨୦ ଇତିହଁ ଏଚେତା ନାନୁ ମୀ ତାଣା ଝାଡ଼ିସାରେ, ମିଙ୍ଗେ ଏନିକଁ ମେସାଲି ମନ କିହିମାଈ ଏଲେକିହଁ ମିଙ୍ଗେ ମେସ୍ତାଆସାରେ, ଅଡ଼େ ମୀରୁ ନାଙ୍ଗେ ଏନିକଁ ମେସାଲି ମନ କିହଁ ହିଲଅତେରି ଏଲେକଁ ମେସ୍ତାଦେରି, ଏଦାଆଁତାକି ନାନୁ ଆଜିମାଈ; ଇତିହଁ ମୀ ବିତ୍ରା ବାଦିବାଦା, ତାହାରା, କପା ଅଡ଼େ ଗଟି ଗଟି ଆନାୟି, ରଅସି ରଆଣାଈ ନିନ୍ଦା କିନାୟି, ସାକ୍ତି କାତା ଜଲିନାୟି, ବଡପଣ ତସ୍ପି ଆହଁ ଗଡ଼ହା ଆନେ; ୨୧ ଇଞ୍ଜା ନାନୁ ଅଡ଼େ ଝେଶ୍ଟେ ଝାଡ଼ିସାରେ ନା ମାହାପୁରୁ ମୀ ତାକି ନାଙ୍ଗେ ଅଡ଼େ ଲାଜା କିଝିକିୟାନେସି, ଇଞ୍ଜା ମୀ ବିତ୍ରା ତଲିଏ ପାପୁ କିହାମାନାରି ତାମି ଲାଗେଏତି କାମା, ଦାରିକାମା ଅଡ଼େ ଦାରି କାମାତାକି ଜୁପକା ଆନାଣି ତାକି ନୀର୍ବ୍ୟ ପାତେକା ମନ ଝେଚ୍ଚହା ହିଲଅରି ଏଝାରି ତାକି ନାନୁ ଦୁକୁଆହଁ ଡ଼ାହାଲିଆନେ ।

୧୩

ଜାଗ୍ରତା କିହଁ ଜହରା ତଲେ ଆକୁତି ରାପ୍ନାୟି

୧ ନୀର୍ବ୍ୟ ତଲେ ତାନି ପାଲି ନାନୁ ମୀ ତାଣା ଝାହିମାଈ, ଦାର୍ମପତିତା ରାସ୍ତକି ଆହାମାନେ, “ଆମିନି ଦହତି କାତା ନୀହଁୟି କିନାୟି ରିଆରି କି ତାନି ଜାଣା ସାକିୟାଁ ତଲେ ତୀରି କିଝିଆନେ” ୨ ଆମ୍ବାଆରି ନକେଏ ପାପୁ କିହାମାଚେରି ଏଝାରାଈ ଇଞ୍ଜା ବାରେତି ଏନିକଁ ତଲି ରୀ ପାଲି ଝେସାମାଞ୍ଜାତେସଁ, ନୀର୍ବ୍ୟ ହେକ ମାଞ୍ଜାନା ଏଲେକିହଁ ଏ ନକେଏ ଝେସିମାଞ୍ଜାଈ, ନାନୁ ଅଡ଼େ ଝାଡ଼ିହଁ ଏଝାରାଈ ତଣ୍ଡ ହୀଆନା ପିହଁଅଁ । ୩ ଏନିକଁ କ୍ରୀସ୍ତ ନା ତାଣା ଜଲିମାଞ୍ଜାନେସି ମୀରୁ ଏଝାଣି ପାରମାଣା ପାରିମାଞ୍ଜେରି; ଏଝାସି ମିଙ୍ଗେତାକି ବାଡ଼ୁୟୁ ହିଲାଆଗାଟାସି ଆଏ, ସାମା ମୀ ତାଣା ବାଡ଼ୁୟୁ ଗାଟାସି ଆନେସି, ୪ ଏଝାସି ବାଡ଼ୁୟୁ ହିଲାଆତାକି ପାସି ମୁଣ୍ଡାତା ଏପକି ଆଡେସି, ଆଡ଼ିଜିକେଏ ମାହାପୁରୁ

ବାଡ଼ୁଛୁ ତି ଏଞ୍ଜିସି ନୀତାମାନେସି । ମାମ୍ମୁ ଜିକେଏ ଏଲେକ୍ଟି ତାନି ତାଣା ବାଡ଼ୁଛୁ ହିଲାଆ ଗାଟାତମି, ସାମା ମାହାପୁରୁତି ବାଡ଼ୁଛୁ ତାକି ମାମ୍ମୁ ମୀ ତାଣା ଏଞ୍ଜାଣିତଲେ ନୀତାମାନମି ।

* ମୀରୁ ନାମୁତଲେ ମାଞ୍ଜେରିକି ଆଏ, ଏ କାତାତା ଜାହା ଜାହାରାଈଁ ତାୟିପାରି କିହାକତାତୁ ଇଞ୍ଜା ଅଣ୍ପାତୁ, କି ଜୀସୁ କ୍ରୀସ୍ତ ମୀ ତାଣା ମାନେସି, ଇଦାଆଁ କି ମୀରୁ ଜାହା ଜାହାରା କାତାତା ପୁଞ୍ଜାହିଲଅତେରି ? ଏଲେଆହ୍ଁ ଆତିହ୍ଁ ମୀରୁ ତାୟିପାରି କିନି ତାଣା ଜୀଣା ଆହ୍ଁ ହିଲଅତେରି । ୬ ସାମା ନାନୁ ବାର୍ସୁ ଇଟାମାଈଁ, ମାର ତାୟିପାରି କିଞ୍ଚିଆହ୍ଁ ଜୀଣା ଆହ୍ପାନାୟି, ଇଦାଆଁ ମୀରୁ ପୁଞ୍ଜେରି । ୭ ମୀରୁ ଏନିକ୍ଟି ଏନି ଲାଗେଏତି କାମା କିଅତେରି, ଇଦାଆଁତାକି ମାହାପୁରୁ ତାଣା ମାମ୍ମୁ ପ୍ରାତାନା କିହିମାନମି; ମାମ୍ମୁ ଏନିକ୍ଟି ତାୟିପାରି କିଞ୍ଚି ଆହ୍ଁ ଜୀଣା ଆହ୍ପାନା ଲେହେଁ ତଞ୍ଜାଆନମି, ଇଦାଆଁତାକି ପ୍ରାତାନା କିହିଲଅମି, ସାମା ମାମ୍ମୁ ତାୟିପାରି କିଞ୍ଚି ଆହ୍ଁ ଜୀଣା ଆଆତିଲେହେଁ ତଞ୍ଜା ଆଆତ୍ଟି ଜିକେଏ ଏନିକ୍ଟି ମୀରୁ ନେହ୍ଁ କାମା କିଦେରି, ଇଦାଆଁତାକି ପ୍ରାତାନା କିହିମାନମି । ୮ ଇତିହ୍ଁ ମାମ୍ମୁ ସାତା କପାଟି ଏନାଆଁ କିହାଲି ଆଡ଼ିହିଲଅମି, ସାମା ସାତା ଝାକିଟି ଦେହେଁ ବାରେ କିହାଲି ଆଡ଼ିନମି । ୯ ଏତିବେଲା ମାମ୍ମୁ ବାଡ଼ୁଛୁ ହିଲାଆ ଗାଟାତମି ଆନମି ସାମା ମୀରୁ ବାଡ଼ୁଛୁ ଗାଟାତେରି ଆଦେରି, ଏତେତା ମାଞ୍ଜେ ରାହ୍ଁ ହତାନେ; ମୀରୁ ଏନିକ୍ଟି ବାରେ ଝାକିଟି ନେହ୍ଁତେରି ଆଦେରି ଏଦାଆଁତାକି ଜିକେଏ ପ୍ରାତାନା କିହିମାନମି । ୧୦ ଏଦାଆଁତାକି ମୀ ତାଣାଟି ହେକ ମାଞ୍ଜାନା ନାନୁ ଇ ବାରେ ରାଡ଼ିମାଞ୍ଜାଈଁ, ଏନିକ୍ଟି ମୀ ତାଣା ଝାହାନା ପ୍ରୁ ନାଞ୍ଜେ ମେକ୍ଟହାଲି ହୀଆନା, ପାଡ଼ିକିହାଲି ହୀହାମାଞ୍ଜାନେସି, ଏ ଅଦିକାରା ଲେହେଁ ମୀ କପାଟି ନିଞ୍ଜାନା ବାଡ଼ୁଛୁ ତସାଲି ମିଞ୍ଜେ ଲଡ଼ା ଆଏ ।

୧୧ ତାୟିୟାଁ ଅଡ଼େ ତାଞ୍ଜିସ୍ତାତେରି, ରାହ୍ଁ କିଦୁ, ନେହ୍ଁତେରି ଆଦୁ, ରଅତେରି ରଅଣାଈଁ ବାର୍ସୁ ହୀଞ୍ଚିଆଦୁ, ରଣ୍ଡିଏ ମନ ଆଦୁ, ହିଡ଼ଡ଼ି ତଲେ ବାସା ଆଦୁ, ଅଡ଼େ ହିଡ଼ଡ଼ି ଇଞ୍ଜା ଜୀଞ୍ଜୁ ନନି ମାହାପୁରୁ ମୀ ତଲେ ଡ଼ୟିନେସି ।

୧୨ କ୍ରୀସ୍ତାନା ତାୟିୟାଁ ଲେହେଁ ସୁଦୁଜୀଞ୍ଜୁ ନଞ୍ଜୁ ତଲେ ଜୀଞ୍ଜୁ

ନଝିଆହାନା ମୀରୁ ମୀରୁଏ ରଅତେରି ରଅଣାଈଁ ନଶ୍ଵାନା ଜହରା
କିଝିଆଦୁ । ୧୩ ଇମ୍ଫାଆଁ ମାନି ମାହାପୁରୁ ଲକୁ ମିଙ୍ଗେ ଜହରା
ଝେସିମାଞ୍ଜାନେରି । ୧୪ ପ୍ରବୁ ଜୀସୁ କ୍ରୀସ୍ତତି କାର୍ମାମେହ୍ନାୟି
ମାହାପୁରୁତି ଜୀଝୁନନାୟି ଅଡ଼େ ସୁଦୁଜୀଝୁ ତଲେ ଆଣ୍ଠିନାୟି ମୀ
ବାରେତାକି ଆୟାପେ ।

ପୁସ୍ତକ ଫେରା

The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଭି (Kuvi)

Contributor: The Word for the World International

ପୁସ୍ତକ ଫେରା, କୁଭି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33